

於昔祭於昔祭辨四飲之物一日清即漿人之醴清也

二日醫謂釀鬻也三日漿即今之載漿謂米汁相將也四日

醴即今之薄鬻也掌其厚薄之齊或厚或薄各以

共王之四飲三酒之饌及后世子之飲與其酒

凡祭祀以法共五齊三酒祭有大小齊有以實

八尊五齊實五尊大祭三貳如祀天地宗廟三

以兩尊以備之中祭再貳如祀日月星辰五祀五岳小

祭一貳如司中司命山澤之皆有酌數酌於尊

唯齊酒不貳五齊之酒特用皆有器量酌器所

中者數量共賓客之禮酒共后之致飲於賓客

之禮醫醴糟皆使其士奉之○凡王之燕飲酒

共其計計其用酒之酒正奉之凡饗士庶子饗

耆老孤子皆共其酒無酌數掌酒之頒賜皆有

法以行之雖君頒賜之酒凡有秩酒者以書契

授之有職則有秩謂每酒正之出謂出以日入

其成日計月入其要月計小宰聽之酒正入文

以待聽斷歲終則會唯王及后之飲酒不會以酒式

誅賞誅賞作酒

善惡者

萍氏

如雍氏王水禁者以萍為名比其浮于水上不沈溺也

掌國之水禁

水有灌載之利而犯之則沈溺故有禁

幾酒

司察非時飲者

謹酒

使民節用酒凡

此者以酒之能溺人猶水也

禁川游者

禁不乘舟而浮游于水中者亦以防沈溺

也○並上

酒者乳也王者法酒旗以布政施天乳以哺人

春秋緯

採南燭草煮其汁為酒碧映五色服之通神

神仙

服食經

西北荒中有玉饋之酒酒泉注焉廣一丈深三

尺酒美如肉澄清如鏡上有玉尊玉蓮取一尊

一尊復生焉與天同依無乾時飲此酒人不死

神異經

梁武帝東行記有覆船山酒瑩山高驪山云昔

高驪有女東海神乘船致酒禮聘之女不肯行

海神撥船覆酒流入曲阿故傳曲阿有美酒曲

阿在丹徒縣

圖經

月氏有井色如酒因名酒井

羊頭山記

君山左右皆有美酒數斛得飲之者不死

湘中記

璇液古酒名

醉鄉日月

枳椇子美如飴能令酒味薄若以其木爲屋柱一屋之酒皆薄

異物志

訶陵國以柳花爲酒

南昌國有酒山山有泉其味如酒飲之甚美醉經月不醒

赤土國物產多同於交趾以甘蔗作酒雜以紫瓜根酒色黃赤味亦香美

隋書

頓遜國有酒樹似安石榴采花汁停瓮中數日

成酒瑤琨去玉門九萬里有碧草如麥割之以

釀酒則味如醇耐飲三合三旬不醒飲甜溪水

隨飲而醒

洞冥記

枸樓國僊漿取之樹腹中青田核以水注之少

頃成酒

異物志

酒滓謂之酪母

集韻

王母會帝於嵩山飲帝以護神養氣金液流暉之酒又有延洪壽光之酒

黃帝內傳

桀王天下酒濁而殺厨人紂王天下熊蹯不熟

而殺厨人

纏子

赤烏之人獻酒千斛於天子

穆天子傳

齊桓公爲大臣具酒期以日中管仲後至桓公舉觴以飲之管仲半棄酒桓公日期而後至飲而棄酒於禮可乎對曰臣聞酒入舌出舌出者言失言失者身棄臣計棄身不如棄酒桓公笑曰仲父起就坐

說苑

趙襄子飲酒五日五夜不廢酒謂侍者曰我誠邦士也夫飲酒五日五夜矣而殊不病優莫曰君勉之不及紂二日耳紂七日七夜今君五日襄公懼謂優莫曰然則吾亡乎優莫曰不亡襄子曰不及紂二日耳不亡何待優莫曰桀紂之亡也遇湯武今天下盡桀也而君紂也桀紂並世焉能相亡然亦殆矣

新序

宋人有酤酒者升概甚平遇客甚謹爲酒甚美縣幟甚高著然不售酒酸怪其故問其所知里長者楊倩倩曰汝狗猛耶狗猛則酒何故而不售曰人畏焉或令孺子懷錢挈壺瓮而往酤而

狗迂而齧之此酒所以酸而不售也夫國亦有狗有道之士懷其術而欲以明萬乘之主大臣爲猛狗迎而齧之此人主之所以蔽脇而有道之士所以不用也

韓子

齊中大夫有夷射者御飲於王醉甚而出倚於郎門門者別跽請曰足下無意賜之餘瀝乎夷射曰叱去刑餘之人何事乃敢乞飲長者別跽走退夷射去別跽因捐水郎門雷下類溺者之狀明日王出而訶之曰誰溺於是別跽對曰臣不見也雖然昨日中大夫夷射立於此王因誅夷射上

漢武作無愁酒飲之令人無憂

玉箱雜記

西王母乘翠鳳之輦而來前導以文虎文豹後列雕麟紫麀曳丹玉之履敷碧蒲之席黃莞之薦共玉帳高會薦清澄琬琰之膏以爲酒

拾遺記

又漢武內傳曰王母云次藥有太玄之酪

糜欽棗出眞陵之山食一枚大醉經年不醒東方朔嘗遊其地以一斛歸進上上和諸香作丸

大如芥子每集羣臣取一丸入水一石頃刻成酒味愈醇醪謂之糜飲酒又謂之真飲酒又謂之僊薌酒香經年不歇

緝柳編

酒有蘭生漢武百味酒也玉璫隋煬帝得法于胡人者也

侍者乃進洪梁之酒酌以文螺之卮卮出波祗之國酒出洪梁之縣此屬右扶風至哀帝廢此邑南人受此釀法今言雲陽美酒兩聲相亂矣

拾遺記

鄒陽酒賦曰清者爲酒濁者爲醴清者聖明濁者頑駭中聖之說或起此乎

蔡邕飲至一石常醉在路上卧人名曰醉龍

孟佗字伯良以菖蒲酒一斛遺張讓卽拜涼州

刺史

後漢書

袁紹辟鄭玄及去餞之城東會者三百餘人皆離席奉觴自旦及暮度玄飲三百餘杯而温克之容終日無怠

上

華歆能劇飲至石餘不亂常整其衣冠號曰華

獨坐

魏書

仙翁爲客設酒不令人傳之見杯自至人前若不盡者則杯不去

葛仙翁傳

左慈拔簪以畫杯酒卽中斷分爲兩向

山濤酒後哺啜折筋不休

昔皇甫嵩性嗜酒每與客飲輒行射覆令不中者卽投一色如其色數命浮以大白客有不勝飲者輒逃去嵩亦不顧笑謂客曰此飲中妙趣豈容俗物知耶

投壘譜

魏陳思王爲鬲頭杓浮於九曲酒池王意有思勸鬲頭則迴向之又爲鵲尾杓長而直王意有所到處於罇上旋之鵲尾則指之

太平廣記○又北齊蘭陵

王爲舞胡子王意有所勸胡子則捧盞以揖之人莫知其所由也

漢末時有一人腹內痛晝夜不眠勅其子曰吾氣絕後可剖視之死後其子果剖之得一銅鎗後華佗聞之便往出巾箱內藥投之鎗卽化爲

清酒

述異記

管輅頓傾三斗而清辯綺粲楊雄酒不離口而

太玄乃就

抱朴子

狄希中山人也能造千日酒飲之千日醉

搜神記

任城王六月沈飲忽失所在人以爲中酒毒而

化

異苑

邴原初辭家求學原舊性能飲酒自行之後八九年間酒不向口單步負笈苦身持力至陳留則師韓子助潁川則師陳仲弓汝南則友范孟博涿郡則友盧子幹臨別師友以原不飲酒會米肉送原原曰本能飲酒但以荒思廢業故斷

之耳今當遠別因見貺餞可以燕飲於是共坐

飲酒終日不醉

魏志

朝議推唐彬楊宗爲監軍晉武帝問散騎常侍文立曰彬宗孰可用立對曰彬宗俱立事績在西不可失也然宗有酒嗜彬性在財欲唯陛下裁之帝曰財欲可足嗜欲難改遂用彬

華陽國志

張華有九醞酒以三薇漬麴蘖蘖出西羌麴出北胡胡中有指星麥四月火星出麥熟而獲之藥用水漬麥三夕而萌芽平旦雞鳴而用之俗



人呼爲雞鳴麥以之釀酒醇美久含令人齒動  
若大醉不叫笑搖動令人肝腸消爛俗人謂之  
消腸酒或云醇酒可爲長宵之樂兩說同而事  
異也閩里歌曰寧得醇酒消腸不與日月齊光

拾遺  
記

姚馥好讀書嗜酒每醉時好言帝王興亡之事  
善戲笑滑稽無窮嘗歎云九河之水不足以漬  
~~地~~八藪之木不足以作薪蒸七澤之麋不足  
以充庖俎凡人稟天地之精靈不知飲酒者動

肉含氣耳何必木偶於心識乎好啜濁糟常言  
渴於醇酒羣輩嘗弄狎之呼爲渴羗及晉武踐  
位忽思見馥立於階下帝竒其倜儻擢爲朝歌  
邑宰馥辭曰老羗異域之人遠隔山川得遊中  
華已爲殊幸請辭朝歌之縣長充養馬之役時  
賜美酒以樂餘年帝曰朝歌紂之故都地有美  
酒故使老羗不復呼渴馥於階下高聲而對曰  
馬圍老羗漸染皇化溥天夷貊皆爲王臣今若  
歡酒池之樂更爲殷紂之民乎帝撫玉几大悅

卽遷酒泉太守地有酒泉其味若酒馥乘醉而拜受之遂爲善政民爲立生祠上

孔奕爲全椒令明察過人時有遺其酒者始提入門奕遙呵之曰人餉吾兩罌酒其一何故非也檢視之一罌果是水或問奕何以知之笑曰酒重水輕提酒者手有輕重之異故耳

晉書

晉爲荊州長沙寺僧法遇弱年好學篤志墳典事道安爲師解悟非常乃避地東下止江陵長沙寺講說衆經受業者四百餘人時有一僧飲

酒廢夕燒香遇但止罌而不遣安公遙聞之以竹筒盛一荆子手自緘封題以寄遇遇開封見杖卽曰此由飲酒也我訓領不勤遠貽憂賜卽命維那鳴椎集衆以杖筒置香橙上行香畢遇乃起出衆前向筒致敬於是伏地令維那行杖三下內杖筒中垂淚自責

高僧傳

石虎於大武殿前起樓高四十丈結珠爲廉垂五色玉珮上有銅龍腹空盛數百斛酒使胡人於樓上噴酒風至望之如雲霧名曰黏雨臺使

以酒塵

拾遺記

劉濬與劉俊飲推讓者久之俊曰謝莊兒不可云不能飲濬曰苟得其人自可流酒千日俊慙不能答

南海以蝦頭爲杯鬚長數尺晉康州刺史常以杯敵簡文及飲無故酒躍於外時廬江太守曲安遠頗解術數卽令筮之安遠曰卽三旬後庭將有喜慶者

菴文類聚

顏延之以醉謁何尚之尚之望見便陽眠延之發簾熟視曰朽木難雕尚之謂左右曰此人醉甚可畏

宋書

謝善勛飲酒至數升醉後輒張眼大罵雖貴賤親疎無所擇也時謂之謝方眼

上

謝幾卿性通脫爲尚書左丞常與樂遊苑宴不得醉而還詣道邊酒壚停車褰幔與車前三騶對飲觀者如堵幾卿自若

南齊書

劉杳在任昉坐有人餉昉梧酒而作椹字昉問杳此字是不杳曰葛洪字苑作木傍杳昉又曰

酒有千日醉當是虛言杳曰桂陽程鄉有千里酒飲之至家而醉亦其例昉大驚曰我自當遺忘實不憶此杳云出楊元鳳所撰置郡事元鳳是魏代人此書仍載其賦三重五品商溪捺里昉卽檢楊記言皆不差

南史

陳侃鄰人曰子門有長者車何不延之侃曰不能備禮隣人墻頭送以濁醪隻鷄遂成終日之

懽

杜註

孫澄字士亮搽履清酌家無餘財雅對賓客接

引忘疲雖不飲酒而好觀人酣興常恐坐客請

歸每勒中厨別進異饌留之止

周書

梁武訪謝舉於兄覽覽曰識菘過臣遠甚惟飲

酒不及臣

梁書

初梁武帝總延後進二十餘人置酒賦詩臧盾以詩不成罰酒一斗飲盡顏色不變言笑自若蕭介染翰便成文無加點帝兩美之曰臧盾之飲蕭介之文席之美也

羊侃不飲酒而好賓遊終日獻酬同其醲醉

陰鏗爲湘東王參軍與賓客宴飲見行觴者因回酒炙授之坐客皆笑鏗曰吾儕終日酣飲而執爵者不知其味非人情也及侯景亂鏗爲賊擒或救之得免鏗問之乃前行觴者並上

胡叟字倫許自涼歸魏賜爵始復男家於密雲蓬室草筵唯以酒自適謂友人金城宗舒曰我此生活似勝焦先志意所栖謝其高矣尋歸家不治產業常苦饑貧然不以爲耻養子字螟蛉以自給養每至貴勝之門恒乘一犉牛敝韋袴

褶而已作布囊容三四斗飲噉醉飽便盛餘肉餅以付螟蛉見車馬榮華者視之蔑如也魏書

太宗與崔浩論事語至中夜大悅賜浩縹醪酒十觚水晶鹽一兩曰朕味卿言若此鹽酒故與卿同其味也上

海東有姓劉人善作酒盛暑可寄千里謂之騎上杯

河東人劉白墮善釀六月以罌貯酒暴於日中動一旬其酒不動飲之香美醉而經月不醒朝

貴相餉踰於千里以其遠至號曰鶴觴永熙中  
青州刺史毛鴻賓齎酒之番路逢盜賊飲之卽  
醉皆被擒時游俠語曰不畏張弓拔刀唯畏白

墮春醪

洛陽伽藍記

劉白墮宿擅工釀採挹河流醞成芳酎懸食同  
枯枝之年排於桑落之辰故酒得其名矣然香  
醪之色清白若滌漿焉別調氛氳不與他同蘭  
薰麝越自成馨逸自王公庶友牽拂相招者每  
云索郎有顧思同旅語索郎反語爲桑落也更

爲籍徵之雋句中書之英談

水經注

魏賈鏘有蒼頭常令乘小艇於黃河中接河源  
水以釀酒名崑崙觴

夏侯夬與南人辛諶庾遵江文遙等終日游聚  
酣飲之際恒相謂曰人生局促何殊朝露坐上  
相看先後問耳脫有先亡者於良辰美景靈前  
飲宴儻或有知庶共歆饗及夬亡後三月上巳  
諸人相率至夬靈前仍共酌飲時日晚天陰室  
中微闇咸見夬在座衣服形容不異平昔時執

盃酒似若獻酬但無語耳

北史

李元忠嘗對壺獨酌使兩婢卷褥以質酒

上

韓晉明執子也有俠氣好酒誕縱招引賓客一

席之費動至萬錢猶恨儉率朝廷處之貴要之

地必以疾辭告人云廢人飲美酒對各勝安能

作刀筆吏返披故紙乎

北齊書

王元景嘗大醉楊遵彥謂之曰何大低昂對曰

黍熟頭低麥熟頭昂黍麥俱有所以低昂

廣記

北齊高洋毀銅雀臺築三臺宮人拍手呼上臺

因以送酒

劉賓客嘉話

韋瓊字敬遠彥寬之兄也志尚夷簡淡於榮利

世宗卽位禮遇逾厚勅有司日給河東酒一斗

號曰逍遙公

後周書

楊尚希有足疾文帝謂曰蒲州有美酒堪養病

屈公卧治之于是拜蒲州

隋書

薛道衡嘗以醴和麥粥食之謂盧思道曰禮之

用和爲貴先王之道斯爲美思道答曰知和而

而不以禮節之亦不可行也

談藪

隋時數人入酒肆味酸且淡乃共嘲此酒一人云酒何處漫行來騰騰失却酉諸人問云此何義答云有水在次一人云酒頭似阿濫餽頭諸人問云何因酒得似阿濫餽頭答曰非鶉頭又一人云酒向他籬得頭四脚距地也獨宿諸人云此有何義答云更無餘義諸人共笑云此嘲最是無豆卽答云我若有豆卽歸舍作醬何因此間飲醋來衆大歡笑

啓顏錄

劉炫有酒弄經一卷

王無功除揚州六合縣丞篤于酒德頗耗職務時天下亂藩部法嚴屢被勘劾嘆曰羅網高懸去將安所遂出所受俸錢積于縣城門前託以風疾輕舟夜遁

安期先生與神女會圓丘酣玄碧之香酒

列仙傳

女丸者陳市上沽酒婦人也作酒常美遇仙人過其家飲酒以素書五卷爲質丸開視其書乃養性交接之術丸私寫其文要更設房室納諸年少飲美酒與止宿行文書之法如此三十年



顏色更如二十時僊人數歲復來過笑謂九曰盜道無師有翅不飛遂棄家追僊人去莫知所之上

夫人設王子喬瓊蘇綠酒

南嶽夫人傳

楊羲夢遊蓬萊山會蓬萊僊公洛廣休既下山半見許主簿相遇於夾石之間公語主簿曰吾爲汝置酒四升在山中可往飲之此太平家酒治人腸也諺曰欲得長生飲太平

真誥

謝玄卿遇神僊設瓊粇酒

續僊傳

王方平以千錢與餘杭姥乞沽酒須臾信還得一油囊酒五斗許使傳姥答言恐地上酒不中

尊飲

神僊傳

問曰未審天上有酒味不答曰無實麴米所造之酒但有業化所作酒也故正法念經云彼夜摩天男共天女衆入池遊戲同飲天酒離於醉過現樂功德味觸色香皆悉具足其中諸天有以珠器而飲酒者受用醑醑之食色觸香味皆悉具足彼如是念此水爲酒令我得飲卽於念

時皆是天酒離於醉過天既飲之增長勝樂善業力故心生歡喜然彼諸天自業力故如是受樂有鳥名爲常樂見彼諸天在歡喜河而飲酒故爲說偈言没入放逸海貪著諸境界此酒能迷心何用復飲酒爲境界火燒不知作不作園林主貪心何用復飲酒彼常樂鳥見樂飲酒天在河飲酒爲調伏故如是說偈

法苑珠林

飲酒戒者佛告諸比丘若言我是佛弟子者不得飲酒酒有二種穀酒木酒穀酒者以諸五穀雜米作酒者是木酒者或用根莖葉果用種種子果草雜作酒者是酒色酒香酒味飲能醉人者是名爲酒若嘗咽者亦名爲飲若飲穀酒咽咽犯若飲酢酒若飲甜酒若噉麩能醉人者若噉糟若飲酒澱若飲似酒色似酒香似酒味能令人醉者並隨咽咽犯若但作酒色無酒香無酒味不能醉人及餘飲者皆不犯

舍利弗白佛言云何世尊說遮道法不得飲酒如葶藶子是名破戒開放逸門云何迦蘭陀竹

園精舍有一比丘疾病經年危篤將死時優波離問言汝須何藥我爲汝覓天上人間乃至十方是所應用我皆爲取答曰我所須藥是違毗尼故我不覓以至於此寧盡身命無容犯律優波離言汝藥是何答曰須酒五升優波離曰若爲病開如來所許爲乞得酒服已消差差已懷慚猶謂犯律往至佛前慙懃悔過

並上

夫婦二人向葡萄酒甕內欲取酒夫妻兩人互見人影二人相妬謂甕內藏人二人相打至死

不休時有道人爲打破甕酒盡了無二人意解

知影懷愧比丘爲說法要夫婦俱得阿惟越致佛以爲喻見影鬪者譬三界人不識五陰四大

苦空身有三毒生死不絕

禪譬喻經  
○以下茗

苦茶一名茶一名游冬

草木狀

丹丘出大茗服之生羽翼

天台記

峒陽黃梨巫山朱橘南中茶子西極石蜜

傳巽  
七誨

郭璞云茶者南方佳木早取爲茶晚取爲茗

阜盧茗之別名葉大而澁南人以爲飲

廣州記

廣博物志 卷之四十一 茶古不聞食晉宋以降吳人採葉煮之名爲茗  
粥

烏程縣西有溫山出御薺 吳興記

巴東有真香茗其花白色如薔薇煎服令人不  
眠能誦無忘 述異記

昔有客過茅君時當大暑茅君於手巾內解茶  
葉一葉與客食之五內清涼茅君曰此蓬萊山  
穆陀樹葉衆僊食之以當飲又有寶文之蔬服  
之不饑謝幼貞詩曰摘寶文之初蔬拾穆陀之

墜葉 謝氏詩源

惠帝蒙塵還洛陽黃門以瓦盃盛茶上至尊 晉

王啟事

苦茶輕換膏昔丹丘子黃山君服之 陶弘景禱錄

燉煌人單道開不畏寒暑常服小石子藥有松

蜜姜桂茯苓之氣時飲茶蘇一二升而已 晉書

桓宣武有一督將因時行病後虛熱便能飲復  
茗必一斛二斗乃飽裁減升合便以爲大不足  
後有客造之更進五升乃大吐有一物出如升

大有口形質縮縐狀似牛肚客乃令置之於盆中  
中以斛二斗復茗澆之此物喻之都盡而止覺  
小脹又增五升便悉混然從口中涌出既吐此  
物病遂瘥或問之此何病答曰此病名斛茗瘥  
續搜神記

餘姚人虞洪入山採茗遇一道士牽三青羊引  
洪至天台瀑泉曰吾丹丘子也聞君善具飲常  
思見惠山中有大茗可以相給祈子他日有甌  
犧之餘不相遺也因立奠祀後常與家人往山

獲大茗焉

異苑

新安王子鸞豫章王子尚嘗詣曇濟道人于八  
公山道人設茶茗子尚味之曰此甘露也何云  
茶茗焉

隋文帝微時夢神人易其腦骨自爾腦痛忽遇  
一僧云山中有茗草煮而食之當愈服之有效  
由是人競採掇乃爲之讚其略曰窮春秋演溷  
圖不如載茗一車

進士權  
紆文

吳郡送扶芳二百樹其樹蔓生纏繞它樹葉圓

而厚凌冬不凋夏月取其葉微火炙使香煮以飲碧深色香其美令人不渴先有壽禪師仁壽間常在內供養造五色飲以扶芳葉為青飲拔楔根為赤飲酪漿為白飲烏梅漿為玄飲江莖為黃飲又作五香飲第一沉香飲次澤蘭香飲次甘松香飲皆有別法以香為主尚食直長謝諷造淮南王食經有四時飲大業拾遺以下藥餌○今夫地黃主屬骨而甘草主生肉之藥也以其屬骨責其生肉以其生肉論其屬骨是猶王孫

綽之欲倍偏枯之藥而欲生殊死之人亦可謂

失論矣淮南子

天下之物莫凶於雞毒然而良醫橐而藏之有所用也是故林莽之材猶無可棄者而况人大戟去水亭歷愈脹用之不節乃反為病並上

薺芘之亂人參蛇床之似藜蕪劉子

西王母謂武帝曰其太上之藥乃有風實雲子玉津金漿宜隣麟膽炎山夜日東掇扶桑之丹樾俯採長河之文蒸太真紅芝九色鳳腦有得

食之後天而老此太上之所服非衆僊之所寶也次藥有斑龍黑胎閬風石髓蒙山白鳳之肺靈丘蒼鸞之血有得服之後天而逝此天帝之所服非下僊之所逮也其次藥有九丹金液紫華紅芝五雲之漿玄霜絳雪若得食之白日昇天此天僊之所服非地僊之所見也

漢武內傳

西王母又謂帝曰太上之藥有中華紫蜜雲山

朱蜜

上○又云僊之上藥有玄都綺葱碧海琅菜次藥有八阮赤薤

夫茂實者翹春之明珠也巨勝者玄秋之沉靈

也丹棗者盛陽之雲芝也茯苓者絳神之伏胎

也玉華含烟玉氣陶精調安六氣養魄護神

錄

集僊

琅玕曲晨之液八瓊九華之丹

上

僊藥有黑河蔡瑚青津碧荻八天赤薤虹丹

酉陽

組襍

華腴蜜也火精茯苓也水寶胡麻也

雲笈七籤

門冬山海經註作疊冬亦作滿冬

黃精一名兔竹一名救窮一名垂珠服其花勝

其實服其實勝其根 抱朴子

薏苡一名薏珠檳榔一名檳門 李當之藥錄

舜常登蒼梧山曰厥金玉之香草朕用偃息正道此乃五加也又異名曰金鹽昔西域真人王屋山人王常言何以得長久何不食石蓄金鹽母何以得長壽何不食石用玉豉玉豉者即地榆也五加地榆皆是煮石而餌得長生之藥也昔尹公度聞孟綽子董士固共相與言曰寧得一把五加不用金玉滿車寧得一觔地榆安用

明月寶珠 東華真人煮石經

地榆一名玉札 神僊服食經

檳榔信南越之可觀子既非常木亦特異大者三圍高者九丈葉聚樹端房構葉下華秀房中子結房外其擢穗似禾其綴實似谷其皮似桐而厚其節似竹而概其中空其外勁本不大末不小上不傾下不邪調直亭亭千百若一步其林則寥朗庇其陰則蕭條信可以長吟可以遠想矣性不耐霜不得北殖必當遐樹海南遼然



萬里弗遇長者之目自令恨深

俞益期

檳榔樹森秀無柯端頂有葉仰望渺渺如插叢  
蕉於木杪風至獨動似舉羽扇之掃天

草木狀

凡方書所名藥物又或與常藥物同而實非者  
如河上姹女非婦人也陵陽子明非男子也禹  
餘糧非米也堯漿非水也而俗人見方用龍膽  
虎掌雞頭鴨蹠馬蹄犬血鼠尾牛膝皆謂之血  
氣之物也見用缺盃覆盆釜鏗大戟鬼箭天鈎  
則謂之鍊瓦之器也見用胡王使者倚姑新婦

野丈人守田公戴文俗徐長卿則謂之人姓名

也近易之草或有不知玄秘之方孰能悉解

抱朴

雲母有五種而人多不能分別也法當舉以向

日看其色詳占視之乃可知耳正爾於陰地視

之不見其襍色也五色並具而多青者各雲英

宜以春服之五色並具而多赤者各雲珠宜以

夏服之五色並具而多白者各雲液宜以秋服

之五色並具而多黑者各雲母宜以冬服之但

有青黃二色者各雲沙宜以季夏服之晶晶純  
白各磷石可以四時長服之也五雲之法或以  
桂葱水玉化之以爲水或以露於鍊器中以玄  
水熬之爲水或以硝石合於筒中埋之爲水或  
以蜜搜酪或以秋露漬之百日韋囊挺以爲粉  
或以無巔草樗血合餌之服之一年則百病愈  
三年老翁反成童子五年則役使鬼神入火不  
燒入水不濡踐棘不傷

雄黃當得武都山所出者純而無雜其赤如雞  
冠光明燁燁者乃可用耳餌服之法或以蒸煮  
之或以酒餌或先以硝石化爲水乃凝之或以  
玄銅錫裹蒸之於赤土下或以松脂和之或以  
三物鍊之引之如布白如水服之皆令長生  
或問道士山居棲巖庇岫不必有網縵之温直  
使我不畏風濕敢問其術抱朴子曰金餅散三  
陽液昌辛丸葷草耐冬煎獨搖膏菌芋玄華散  
秋地黃血丸皆不過五十日服之而止不畏風  
濕若服金丹大藥雖未昇虛輕舉然體不受疾

雖當風卧濕不能傷也服此七藥皆始學道者耳姚先生但服三陽液但袒卧冰上了不寒振此皆介先生及梁有道卧石上及秋冬當風寒已試有驗祕法也

按玉策記及開名經皆以五音六屬知人年命之所在子午屬庚卯酉屬巳寅申屬戊丑未屬辛辰戌屬丙巳亥屬丁一言得之者宮與土也三言得之者徵與火也五言得之者羽與水也七言得之者商與金也九言得之者角與木也若本命屬土不宜服青色藥屬金不宜服赤色藥屬木不宜服白色藥屬水不宜服黃色藥屬火不宜服黑色藥以五行之義木尅土土尅水水尅火火尅金金尅木故也

按中黃子服食節度云服治病之藥以食前服之服養性之藥以食後服之服金丹大藥不復論宜與不宜也

韓終服菖蒲十三年身生毛日視書萬言皆誦之冬恒不寒又菖蒲須得生石上一寸九節已

上紫花者尤善也趙他子服桂二十年足下生  
毛日行五百里力舉千觔移門子服五味子十  
六年色如玉女入水不濡入火不灼也楚文子  
服地黃八年夜視有光林子明服朮十一年耳  
長五寸身輕如飛能超踰淵谷二丈許杜子微  
服天門冬御八十妾有子百三十人行三百里  
任子季服茯苓十八年僊人玉女在從之能隱  
能彰不復食穀灸癥皆滅面體玉光陵陽子仲  
服遠志十年有子三十七人開書所視不忘坐

在立亡

並上

僊藥紫鳳腦千里髑髏是也

述異記

神農稽首再拜問於太一小子曰鑿井出泉五  
味煎煮口別生熟後乃食咀男女異利子識其  
父曾聞太古之時人壽過百無殂落之咎獨何  
氣使然耶太一小子曰天有九門中道最良日  
月行之名曰國皇字曰老人出見南方長生不  
死衆耀同光神農乃從其嘗藥以救人命  
神農有子年七歲有暱德同歷各山辯其百藥

神農本草

真源賦

歲在甲午王君復與東華青童來降與夫人成藥兩劑一曰遷神白騎神散一曰石精金光化形靈丸便頓而服之稱疾不行凡七日太一玄僊遣飈車來迎夫人乃託劍化形而去

魏夫人傳

崔文子者太山人也文子世好黃老事居潛山下後作黃散赤丸賣藥都市後有疫氣民死者萬計文擁朱幡繫黃散以徇人門飲散者即愈故世寶崔文赤黃散實近於神焉

列僊傳

玄俗自稱河間人服巴英賣藥都市七九一錢善治百病漢河間王患瘕買藥服之下地十餘條問藥意俗曰王瘕乃六世餘殃下墮即非王之所招王嘗放乳鹿麟母也仁心感天故遭俗耳王家老舍人自言父世見俗俗之身無影王乃呼著日中看實無影王以女聘之俗夜亡去後人見於常山下

上

北海于君病癩見市有賣藥姓公孫帛因問之公曰明日木蘭樹下當教卿明日往授素書二

卷以消災救病無不愈者

神僊傳

容成公服三黃得僊所謂雌黃雄黃黃金也

尹軌者字公度太原人也常服黃精華日三合

腰佩漆竹筒十數枚中皆有藥言可辟兵疫

並上

靈飛散未央丸制命丸羊血丸皆令人駐年却

老

抱朴子

昭王坐祗明之室晝而假寐忽夢白雲蔚蔚而起有人衣服並皆毛羽因各羽人夢中與語問以上僊之術羽人曰大王精智未開欲求長生

久世不可得也王跪而請受絕慾之教羽人乃以指畫王心應手卽裂王乃驚寤而血濕衿席因患心疾卽卻膳撤樂移於旬日忽見所夢者復來語王曰先欲易王之心乃出方寸綠囊中有續脉明丸補血精散以手摩王之臆俄而卽愈王卽請此藥貯以玉缶緘以金繩王以塗足則飛天地萬里之外如遊咫尺之內有得服之後天而老

拾遺記

有獻不死之藥於荆王者謁者搯以入中射之

士問曰可食乎曰可因奪而食之王怒使人殺中射之士中射之士使人說王曰臣問謁者謁者曰可食臣故食之是臣無罪罪在謁者也且客獻不死之藥臣食之而王殺臣是死藥也王乃不殺

戰國策○東方朔事同此不重錄

武帝末年彌好僊術與東方朔狎暱帝曰朕所好甚者不老其可得乎朔曰臣能使少者不老帝曰服何藥耶朔曰東北有地日之草西南有春生之魚帝曰何以知之朔曰三足鳥數下地

食此草羲鳥欲馭以手掩鳥目不聽下也蓋鳥獸食此草則美悶不能動矣帝曰子何以知乎朔曰臣小時掘井陷落地下數十年無所託寄有人引臣欲往此草中隔紅泉不得渡其人以一隻屐與臣臣汎紅泉得至此草之處臣採而食之其國人皆織珠玉爲業邀臣入雲端之幕設玄珉雕枕刻黑玉銅鏤爲日月雲雷之狀亦曰鏤雲枕又薦蛟毫之白褥以蛟毫織爲褥也此毫柔而冷常以夏日舒之因名柔毫褥又有

水漑之屏臣舉手拭之恐水流濕其席乃其光也

洞冥記

魏太和中姜維歸蜀失其母魏人使其母手書

呼維令反并送當歸以辟之維報書曰良田百

頃不計一畝但見遠志無有當歸維卒不免

宋書

神女蘭香降張碩碩問禱祀何如香曰消摩自

可愈疾淫祀無益香以藥為消摩

曹毗杜蘭香傳

皇甫謐初服寒食散而性與之忤每委頓不倫

嘗悲恚叩亦欲自殺叔母諫之而止

晉書

時宋淮南趙習元嘉二十年為衛軍府佐疾病

經時憂必不濟恒至心歸佛夜夢一人形貌秀

異若神人者自屋梁上以小裹物及剃刀授習

云服此藥用此刀病必即愈習既驚覺果得刀

藥焉登即服藥疾除

法苑珠林

丘傑字偉跣烏程人也十四遭喪以熟菜有味

不嘗於口歲餘忽夢見母曰死止是分別耳何

事乃爾茶苦汝噉生菜遇蝦蟇毒靈牀前有三

丸藥可取服之傑驚起果得甌甌中有藥服之



下科斗子數升

南史

何黠少時患渴逾歲不愈復在吳中石佛寺建講所晝寢夢一道人形貌非常授丸一掬夢中服之而瘥

大通初陶弘景獻二丹其一各善勝一名成勝並爲佳寶

並上

梁彥光七歲時父遇篤疾醫云餌五石可愈時求紫石英不得彥光憂悴不知所爲忽於園中見一物彥光所不識怪而持歸卽紫石英也親

屬咸異之以爲至孝所感

北史

孫舉字彥舉學淺行薄嘗服棘刺丸李諧調之曰卿應自足何假外求坐者皆笑

上

隋邵王子隆年二十一而體過充壯常使徐嗣伯合蘆茄丸服以自銷損

隋書

卧牛池縣南八十里廣德寺內相傳隋煬帝宮姬有惡疾願出爲尼乘白牛至此牛卧不去姬止宿浹旬見癩鼠屢嚙一草飲浴於池旣而癩愈姬疑之亦從採食飲泉沐浴疾愈後入朝備

述愈疾之由遂遣使取所食草乃何首烏也至  
今池邊盛生

湖廣志

道僊或勞疾見縹衣童子從青溪水出椀盛妙  
藥跪而進服無幾便愈

高僧傳

有長者居明貞修稟性良謙請佛及僧九十日  
四事供養有一比丘來索藥長者問曰何所患  
苦答曰頭痛長者答曰此必膈上有水仰攻其  
頭以是頭痛卽施一呵梨勒果因服病除緣是  
福報九十一劫未曾病患

法苑珠林

四十一卷終

廣博物志卷之四十二

隴西董斯張纂

閩中曹學佺訂

草木一

穀

芝

諸草

諸木

天文以七列精以五故嘉禾之滋莖長五尺五  
七三十五神盛故連莖三十五穗以成盛德禾  
之極也 春秋說題辭

都廣之野百穀自生冬夏播琴

播琴猶播殖○山海經

粟神名許給姓庸天

麥神名福習

黍神名



併倭蘭郝

荳神名靈殖姓樂

春秋佐助期

甲貨之戶曰粢為上物賈七十乙貨之戶曰黍為中物石六十丙貨之戶曰赤荳為下物石五十丁貨之戶曰稻粟令為上種石四十戊貨之戶曰麥為中物石三十己貨之戶曰大荳為下物石二十庚貨之戶曰穰比疏食故無賈辛貨之戶曰果比疏食無賈壬癸無貨

越絕書

夫稼為之者人也生之者天也養之者地也是以稼之容足耨之容耰耘之容手是謂耕道農

攻食工攻器賈攻貨時事不龔斂之以土功是謂大凶凡稼蚤者先時暮者不及時寒暑不節稼乃多災冬至已後五旬有七日而昌生於是乎始耕事農之道見生而藝生見死而獲死天發時地產財不與人期有年祀土無年祀土無失人時迫時而作過時而止老弱之力可使盡起不知時者未至而逆之既往而慕之當其時而薄之此從事之下也夫耨必以旱使地肥而土緩稼欲產於塵土而殖於地堅者慎其種勿

使數亦無使疎於其施土無使不足亦無使有餘畝欲深以端畝欲沃以平下得陰上得陽然後盛生立苗有行故速長強弱不相害故速大正其行通其中疏爲冷風則有收而多功率稼望之有餘就之則疏是地之竊也不除則蕪除之則虛是事之傷也苗其弱也欲孤其長也欲相與居其熟也欲相與扶三以爲族稼乃多穀凡苗之患不俱生而俱死是以先生者美米後生者爲粃是故其耨也長其兄而去其弟樹肥無使扶疎樹境不欲專生而獨居肥而扶疎則多粃境而獨居則多死不知耨者去其兄而養其弟不收其粟而收其粃上下不安則稼多死得時之禾長稠而大穗圓粟而薄糠米粘而香春之易而食之強失時之禾深芒而小莖穗銳多粃而青薺得時之黍穗不芒以長搏米而寡糠失時之黍大本華莖葉膏短穗得時之稻莖葆長稠穗如馬尾失時之稻纖莖而不滋厚糠而菑死得時之麻疎節而色陽堅臬而小本失

時之麻蕃柯短莖岸節而葉虫得時之菽長莖而短足其莢二七以為族多枝數節競葉繁實稱之重食之息失時之菽必長而蔓浮葉虛本疎節而小莢得時之麥長稠而頸族二七以為行薄翼而藪色食之使人肥且有力失時之麥肘腫多病弱苗而莢穗是故得時之稼豐失時之稼約庶穀盡宜從而食之使人四衛變強耳目聰明凶氣不入身無苛殃善乎孔子之言冬飽則身溫夏飽則身涼夫溫涼時適則人無病

瘳人無病瘳是疫癘不行故曰穀者人之天是以興王務農王不務農是棄人也王而棄人將何國哉

亢倉子

嘉禾五穀之長王者德盛則二苗共秀於周德三苗共穗於商德同本異穗於夏德異本同秀

宋書

巨鬯三禺之禾一稔二米王者宗廟修則出

上

周時倭人貢鬯草

破藏稷逼麥稷此二者以四月熟

廣志

黍有燕鵠黍牛黍

秔有烏秔白穰青幽白夏之名

並上

汜勝之種殖書無稷

爾雅釋文

獲菽尋汜氏之書露葵徵尹君之錄

類林

獲再生者名稻孫

稻書

郭上之黍北里之禾一茅三脊

封禪所籍也○管子

玄山之梨不周之稻陽樸之薑越裳之梅

崔駰七依

華薌重秬濁皋香秔

南都賦

雍丘之梁清流之稻

魏都賦

江表唯長沙有好米上風炊之五里聞香

魏文帝書

鄂都山上樹木水澤如世間但稻米粒幾大味

如菱其餘四穀不爾但名稻為重思耳杜瓊作

重思賦曰霏霏春茂翠矣重思靈炁交被嘉穀

應時四節既享祝人以祀神禾鬱乎浩京巨穗

橫我玄臺爰有明祥帝者以熙此之謂矣

真誥

因祗國丈夫勤於耕稼一日鋤十頃地又貢嘉

禾一莖盈車故時俗四言詩曰力勤十頃能致

嘉穎

拾遺記

員嶠多大鵠高一丈銜不周之粟粟穗高三丈粒皎如玉鵠銜粟飛于中國其粟食之歷月不饑

有背明之國來貢其方物言其鄉在扶桑之東見日出於西方其國昏昏常暗宜種百穀名曰融澤方三千里五穀皆良食之後天而死有浹日之稻種之十旬而熟有翻形稻言食者死而更生天而有壽有清明稻食者延年也清腸稻食一粒歷年不饑有搖枝粟其枝長而弱無風

常搖食之益髓有鳳冠粟似鳳鳥之冠食者多力有遊龍粟葉屈曲似遊龍也有瓊膏粟白如銀食此二粟令人骨輕有繞明苳其莖弱自相縈纏有挾劍苳其莢形似人挾劍橫斜而生有傾離苳言其苳見日葉垂覆地食者不老不疾有延精麥延壽益氣有昆和麥調暢六府有輕心麥食者體輕有醇和麥爲麴以釀酒一醉累月食之凌冬可袒有含露麥穗中有露味甘如飴有紫沉麻其實不浮有雲冰麻實冷而有光



宜為油澤有通明麻食者夜行不持燭是苣勝也食之延壽後天而老並上

神農就田作耨天應以嘉穀禮含文嘉

禹時天雨稻古詩云安得天雨稻飼我天下民

述異記

西方佛沙伏國有昔尸毗王倉庫為火所燒其粳米焦然於今猶在若服一粒永無瘡患彼國

人民須以為藥伽藍記

炎帝時有丹雀銜九穗禾其墜地者帝乃拾之

以植於田食者老而不死拾遺記

丙午至于鷓鴣氏爰有樂野溫和稔麥之所草

穆天子傳

八駿東征止收黑水之麥七華西討纔獲苦山

之菜周弘正謝敕賈紫鮮啓

桓公觀於野曰何物可比於君子之德乎隰朋

對曰夫粟內甲以處中有卷城外有兵刃未敢

自恃自命曰粟此其可比於君子之德乎管仲

曰苗始其少也朏朏何其孺子也至其壯也莊

莊乎何其士也至其成也由由乎茲免何其君子也天下得之則安不得則危故命之曰禾此其可比於君子之德矣

管子

文公得玄山之粟而美之欲種之宮中問于冀缺對曰臣嘗服稼穡之事矣凡五穀必以種今君所植者末也種之必不能生公曰寡人不慧不知稼穡微子之言惑其不解乎冀缺曰務農重穀國之本也君之言及此晉國之福也

晉史

吳起欲攻小亭置一石赤黍門外令人能徙此至於西門外者賜之上田宅人爭徙之乃下令曰明日攻秦能先登者仕之大夫賜之上田宅於是攻之一朝而拔

韓非子

歸州有米田屈原耕此產白米似玉

范冉遭黨錮推鹿車載妻子以捃拾自資兒嘗拾得五斛麥鄰人遺之一斛冉後知卽令併送

六斛還

後漢書

蔡茂初在廣漢夢坐大殿極上有三穗禾茂跳取之得其中穗輒復失之以問主簿郭賀賀離

席慶曰大殿者官府之形象也極而有禾人臣之上祿也取中穗是中台之位也於字禾失為秩雖曰失之乃所以得祿秩也袞職有闕君其補之旬月而茂徵焉上

孔融教高密令曰志士鄧子然告困焉得愛釜庾之間以傷烈士之心與荳三斗

吳孫亮五鳳元年六月交趾稗草化為稻昔三苗將亡五穀變種此草妖也其後亮廢晉書

全琮父使琮齎米數千斛到吳交易皆散空船而還曰所市非急而士大夫方有倒懸之患便賑贍不啓報父父大奇之吳志

魯肅不治家事以賑窮結士為務周瑜為居巢長過肅并求資糧肅時有兩困米各三千斛肅乃指一困與瑜瑜遂定僑札之交上

衛倫過予言及於味稱魏故侍中劉子陽食餅知鹽生精味之至也予曰荀勗識勞新易牙別淄澠子陽今之妙也定之何難倫因命僕取糗糧以進予嘗之曰麥也有杏李柰味三果之熟

也不同意焉得兼之倫笑而不答退告人曰士  
安之識過劉氏吾將來家實多故杏時將發糶  
以杏汁李柰又糶以李柰汁故兼三味玄晏  
春秋  
余慎終屋之南榮有孤黍生焉因泥之濕遭雨  
之潤宿昔牙蘖滋茂甚速塗燥根淺忽然萎殞  
深感此黍不韜種以待時貪榮棄本寄身非所  
自取凋枯不亦宜乎晉嵇含孤黍賦序

王褒字偉元計口而食嘗刈麥人助之褒棄之

魏志

郭翻少有志操居貧無業起往古荒田先立表  
題經年無主然後乃作將熟有認之者翻悉推  
與之縣令聞以稻歸翻翻不受晉中興書

東魏後靜帝天保初四月禾夜生於帝銅硯中  
及明晨長數寸有穗其年帝遇鴆而崩廣五行  
記

隋文創歷佛教大興廣募遺僧依舊安置時梗  
梓一谷三十餘僧應詔出家並住官寺唯道安  
依本山居守素林壑時行村聚惠益生靈村中  
田遺生者家徒壁立而有四女著幣布齊膝而

已四女赤露大女名華嚴年已二十唯有麤布二尺擬充布施安引村衆次至其門愍斯貧苦遂度不入大女思念由我貧煎不及福會今又不修當來倍此周徧求物閱爾無從仰面悲號遂見屋甍一把亂麻用塞明孔挽取科揀得穀十餘按以成米并將前布擬用隨喜身旣無衣待至夜暗匍匐而行趣齋共所以前施物遙擲衆中十餘粒米別奉炊飯因發願曰女人窮業久自種得竭貧行施用希來報輒以十餘黃米

投飯甑中必若至誠貧業盡者當願所炊之飯變成黃色如無所感命也奈何作此誓已掩淚而返於是甑中五石米飯並成黃色大衆驚嗟未知所以周尋緣構乃云田遺生女之願力也

高僧傳

滕景真在廣州七層寺元徽中罷職歸家婢炊釜中忽有聲如雷米上芄芄隆起滕就視聲轉壯甑上花生數十漸長似蓮花色赤有光侶金俄傾萎滅旬日滕得病卒

異苑

考功郎竇一嘲麥鐵杖曰麥是何姓鐵杖應聲對曰麥豈不殊邪忽相怪竇赧然無以應之隋書

○以下芝

芝英者王者親近耆老養有道則生宋書

句曲山五芝求之者投金環二雙於石間勿顧念必得矣第一芝名龍仙食之為太極仙第二芝名叅成食之為太極大夫第三芝名燕胎食之為正一郎中第四芝名夜光洞草食之為太清左御史第五芝名料玉食之為三官真御史

茅君內傳

閩野者閩風之府是也崑崙上有九府是為九宮太極為太宮也諸仙人俱是九宮之官僚耳至於真人乃九宮之公卿大夫仙官有上下各有次秩仙有左右府而有左右公左右卿左右大夫左右御史也明大洞為仙卿服金丹為大夫服象芝為御史若得太極隱芝服之便為左右仙公及真人矣真誥

羅江大霍有洞臺中有五色隱芝華陽洞亦有

五種夜光芝良常山有熒火芝此物在地如熒火狀其實似草而非也大如荳形紫華夜視有光得食一枚心中一孔明食七枚七孔明可夜書計得食四十七枚壽萬年包山中有白芝又有隱泉之水正紫色華陽雷平山有田公泉水飲之除腹中三虫與隱泉水同味云是玉砂之流津也用以浣衣不用灰以此爲異耳

上

食四節隱芝者位爲真卿食金闕玉芝者位爲司命食流明金英者位爲司祿食長曜雙飛者

位爲真伯食夜光洞草者總主左右御史之任

真仙  
通鑑

名山生神芝不死之草上芝爲車馬形中芝爲人形下芝爲六畜形

石芝者石象芝生於海隅名山及島嶼之涯有積石者其狀如肉象有頭尾四足者附於大石赤者如珊瑚白者如截肪黑者如澤漆青者如翠羽黃者如紫金而皆光明洞徹如堅冰也晦夜去之三百步便望見其光矣大者十餘觔小

者三四觔非久齋至精及佩老子入山靈寶五符亦不能得見此輩也凡見諸芝且先以開山却害符置其上則不得復隱蔽化去矣徐徐擇王相之日設醮祭以酒脯祈而取之從日下禹步閉氣而往也玉脂芝生於有玉之山常居懸危之處玉膏流出萬年已上則凝而成芝有似鳥獸之形色無常采率多似山玄水蒼玉也亦鮮明如水精得而未之以無心草汁和之須臾成水服一升得一千歲也七明七光芝皆石也

生臨水之高山石崖之間狀如盤椀不過徑尺以還有莖蒂連綴之起三四寸有七孔者名七明九孔者名九光光皆如星百餘步內夜皆望見其光其光自別可散不可合也常以秋分伺之得之擣服方寸匕入口則翕然身熱五味甘美盡一觔則得千歲令人身有光所居暗地如月可以夜視也石蜜芝生少室石戶中戶上刻石爲科斗字曰得服石蜜芝一斗者壽萬歲石桂芝生名山石穴中似桂樹而實石也高尺許



大徑尺光明而味辛有枝條擣服之一觔得千歲也石腦芝生滑石中初破之其在石中五色光明而自動服一升得千歲矣石硫黃芝五嶽皆有而箕山爲多其方言許由就此服之而長生故不復以富貴累意不受堯禪也如此有百二十皆石芝也事在太乙玉策及昌宇一作內字記不可具稱也及夫木芝者松脂淪入地千歲化爲茯苓萬歲其上生小木狀似蓮花名曰木威喜芝夜視有光持之甚滑燒之不然帶之辟

兵以帶雞而雜以他雞十二頭共籠之去之十  
二步射十二箭他雞皆傷帶威喜芝者終不傷  
也從生門上採之於六甲陰乾之百日末服方  
寸七日三盡一枚則三千歲也千歲之栢木其  
下根如坐人長七寸刻之有血以其血塗足下  
可以步行水上不沒以塗人鼻以入水水爲之  
開可以止住淵底也以塗身則隱形欲見則拭  
之又可以治病又刮以雜巨勝爲燭夜遍照地  
下有金銀玉寶藏則光變青而下垂以錘掘之

可得也末之服盡十觔則千歲也又松樹枝三千歲者其皮中有聚脂狀如龍形名曰日飛節芝大者重十觔末服之盡十觔得五百歲也菌芝或生深山之中或生大木之下或生泉之側其狀或如宮室或如車馬或如龍虎或如人形或如飛鳥五色無常亦百二十種自有圖也皆當禹步往採取之刻以骨刀陰乾末服方寸七人人昇仙中者數千歲下者千歲也又有樊桃芝其木如昇龍其花葉如丹羅其實如翠鳥高

不過五尺生於名山之陰東流泉水之上以立夏之候伺之得而未服之盡一株得五千歲也參成芝赤色有光扣之枝葉如金石之音折而續之卽復如故木渠芝寄生大木上如蓮花九莖一叢其味甘而辛建木芝實生於都廣其皮如纓虵其實如鸞鳥此三芝得服之白日昇天也黃盧子尋木華玄液華此二芝生於泰山要鄉及奉高有得而服之皆令人壽千歲黃蘗檀桓芝服之者千歲黃蘗木下根有如三斛器去

本株一二十余丈有以細根相連狀如縷得未而服之盡一枝則成地仙不死也此輩復有百二十種自有圖也草芝有獨搖芝無風自動其莖大如手指赤如丹素葉似莧其根有大魁如斗有細者如雞子十二枝周繞大根之四方如十二辰也相去丈許皆有細根如白髮以相連生高山深谷之上其所生左右無草得其大魁未服之盡則得千歲服其細者一枝百歲可以分他人也懷其大根卽隱形欲見則左轉而出之牛角芝生虎壽山及吳坂上狀似蔥特生如牛角長三四尺青色未服方寸七日三至百日則得千歲矣龍仙芝狀似昇龍之相負也以葉爲鱗其根則如蟠龍服一枝則得千歲矣麻母芝似麻而莖赤色花紫色紫珠芝其花黃其葉赤其實如李而紫色二十四枚輒相連而垂如貫珠也白苻芝高四五尺似梅常以大雪而花季冬而實朱草芝九曲曲有三葉葉有三世也五德芝狀似樓殿莖方其葉五色各具而不雜

上如偃蓋中有甘露紫氣起數尺矣龍御芝常以仲春對生三節十二枝下根如坐人凡此草芝又有百二十種皆陰乾服之則令人與天地相畢或得千歲二千歲

抱朴子

青雲芝生於名山之陰青蓋三重上有雲氣覆之食之令人壽能乘雲通天見鬼神

靈芝一名壽潛一名希夷

續古今註

西王母云仙藥有太真紅芝草

漢武內傳

文山紫芝雍梁朱草生長和氣王以為寶

焦氏易林

瑤光得陵出黑芝

運斗樞

有七色芝生玉梁下其色青光輝耀謂之蒼芝

拾遺記

欲求芝草入名山必以三月九月此山開出神藥之月也勿以山俚日必以天輔時三奇會尤佳出三奇吉門到山須六陰日明堂之時帶靈寶符牽白犬抱白雞以白鹽一斗及開山符檄着大石上執吳唐草

或作花

一把以入山山神喜必得之也又採芝及服芝欲得王相專和之日

支干上下相生爲佳此諸芝名山多有之但凡庸道士心不專精行穢德薄又不曉入山之術雖得其圖不知其狀亦終不能得也

抱朴子

柱無故生芝者白爲喪赤爲血黑爲賊黃爲喜其形如人面者亡財如牛羊者遠役如龜蛇之

類者田蠶耗

彙苑

林屋洞有白芝紫泉

月精芝秋生山羊石上服之長生

炎帝始教民耒耜勤畎畝之事百穀滋阜聖德

所感無不著焉神芝發其異色靈苗擢其嘉頰

陸池丹蘂駢生如蓋香露滴瀝下流成池因爲

參龍之圃朱草蔓衍於街衢卿雲蔚藹於叢薄

拾遺

記

黃帝以五芝爲房名

徐整長曆

黃帝陞鴻隄受神芝於黃蓋

路史

章帝元和二年芝生沛如人冠又生章武如人

抱三子狀建初五年芝生潁川常以六月中生

一葉五歲五重春青夏紫秋白冬黑色十月後

黃氣出上尺五寸 古今註

陸機為詩草木疏劉杳為離騷草木疏

曰馮生陽闕 日馮木之先也 陽闕生喬如喬如生幹木

幹木生庶木凡根拔木者生於庶木根拔生程

若 根拔草先也 程若生玄玉玄玉生醴泉醴泉生皇

辜皇辜生庶草凡根拔草者生於庶草海閭生

屈龍 海閭浮草之先也 屈龍生容華容華生藁藁生萍

藻萍藻生浮草凡浮生不根拔者生於萍藻 淮南

凡草生而初達謂之葆江淮陳之內謂之茂青

齊堯冀之間謂之藁燕之北鄙朝鮮冽水之間

謂之策故傳曰慈母之怒子也雖折藁笞之其

惠存焉 方言

雍氏 主除草者 掌殺草 草害稼穡故殺之 春始生而萌之 春

氣始達故萌之而弗治也 夏日至而夷之 夷平也謂迫地而刈之也夏至一陰

生故可以夷之也 秋繩而芟之 含實曰繩芟其繩則不成熟矣 冬日至

而耜之 冬至一陽生則用耜以去根也 若欲其化也 欲化則為土則

以水火變之 以火而燒其芟夷之本末又從而加以水也 掌凡殺草

之政令 周禮

柞氏 主除木者 掌攻草木及林麓 攻治也積木曰麓 夏

日至令刊陽木而火之 刊謂斫去其皮也山南曰陽陽木以至陽之日

刊而火之 曰陰陰木以至 冬日至令剝陰木而水之 剝亦刊也山北

陰之日剝而水之則陽木陰木皆不復生矣 若欲其化也 欲其化而為日則

春秋變其水火 則陰木至春又從而火之陽木至秋又從而水之則無萌蘖之

矣 生 凡攻木者掌其政令 凡治木者皆有政以正之令以命之○上

木有松栢榲檀之倫百八十餘種草有芝英萍

實靈沼黃精白符竹嬰戒火長生不死者萬數

列仙傳序

萆蘇白蓉也 茈蓼蕨也 集蓉也 王白薺也 菹蕞

也 藜蘆慈蔞也 菑蔭地榆也 莪蒿蘆蒿也 藟蘭

也 藟茅蔽也 廉薑蓀也 草蒿青蒿也 搗乳苦杞

也 游冬苦菜也 棗姑艾但鹿何澤鞠也 莖羊躑

也 牛荃牛薺也 馱耳馬莧也 邛昌陽菖蒲也 孳

夷芍藥也 薪莫馬辛也 葍葍魚薺也 狗薺大室

藤也 薏萑也會及五味也 山蘄當歸也 芪母兒

踵東棍也 郝蟬也 蓼也 飛廉扇蘆也 伏豬木禾

廣雅釋詁 卷之四 三

也貝父藥實也王連蕪苑遠志也其上謂之小草黃良大黃也菀蒼黃文內虛黃芩也因塵馬先蛇果馬麻蛇床也蔓莠也常蓼馬尾商陸也鬼桃鈔弋羊桃也虎蘭澤蘭也裏續斷也地髓地黃也薰草蕙草也茯神茯苓也苾蒻陵苕蘧麥也女蘿松蘿也陵澤甘遂也馬唐馬飯也山薑菜也地血茹蘆蓂也兔耳絲也地筋枸杞也地毛莎隋也美丹甘草也苦萃欵凍也黃精龍銜也細條少辛細辛也菝葜狗脊也陵芟薺苟也茨明羊角也苓耳菴常泉胡泉泉耳也雞狗獮哺公也羊躑躅英光也堇藿也華藜也寄屏寄生也犁如桔梗也白菜牡丹也龍木龍須也柰莖澤柰也顛棘女木也陵遊龍膽也鹿腸玄參也地精人葠也苦心沙參也其蒿青藜也飛芝烏毒也楚蘅杜蘅也葑茹水芋烏芋也龍沙麻黃也無心鼠耳也女腸女宛也天豆雲實也瓠苳也空竹也其表曰篋其裏曰本篋籥籥籥桃支也箭箛箛也菌蕪也其葉謂之蕙蕪芋



也其莖謂之軟孳茄鳧葵也菀薺也荆葵菘也  
苳莫也苞菴也水苜蓿也屈居盧茹也醜菝蓆  
菽也菹子菜也山蒞菽香藁本也貫節貫衆也  
贛起實章呂也女青烏葛也巴未巴荳也烏睨  
廉也燕蕒嬰舌也苳蒺苳草也菝茨雞頭也周  
麻也土瓜菹也葵茹瓠瓢王瓜也王廷儲蕒署  
預也恆山蜀黍也藟藤也石髮石衣也采導采  
也秆稔稽朶也黍穰謂之稊稻穰謂之稗稷穰  
謂之穠麻黃莖狗骨也白芷其葉謂之葯公蕒

穰菜薺莖在蘇也秬稷也秫稷也稊穰穰穰稊稊  
也臙蒺也大荳赤也小荳荅也罌荳豌豆留荳  
也胡荳蜂躩也大麥麩也小麥麩也葍菘茅穗  
也蒲穗謂之尊筩籥箛箛箛箛箛箛也蕪奚毒  
附子也一歲爲薊子二歲爲烏喙三歲爲附子  
四歲爲烏頭五歲爲天雄藹葩菁藥花華也楮  
杜蔽菱芡株棍也隋蓆也萌芽留夢孽也蘇菜  
芬菴蘆毛草也草藜生爲薄著耆也益母充蔚  
也管茅也粢黍稻其采謂之禾荳角謂之菹其

葉謂之藿英葍莠也苗萑芙蓉也韭薺蕎其華  
謂之菁歸葵也藿梁木稷也蒿藜蕪也菴臺也  
菟蘭也菰蔣也其米謂之胡菘龍頡馬蓼也賈  
麋也繁母芴勃也菘蕪蘆蔽也豐蕘蕪精也匏  
瓠也冬瓜菰也水芝瓜也其子謂之瓠龍蹏虎  
掌羊骹兔頭桂支蜜甯頤瓠狸頭白瓠無餘縑  
瓜屬也狗蝨鉅膝引胡麻也芬菘水蘇也當道  
馬舄也鞠菌鞠生也徐長卿鬼督郵也附支蒲  
草也鬼箭神箭也缺盆陸英莓也海蘿海藻也  
地葵地膚也狼毒也慈苾蘭蕪也苞鉤吻也管  
邪烏韭也在屋曰管邪在墻曰垣衣馬薺荔也  
水衣涪也麥菜藻也藁荷蓴苴也蔗鹿藿也鳶  
尾鳥蓮射干也木實酸木狐桃也烏翹蒿也白  
芷菴蕘也馬帚屈馬第也蕪蒲莞也矜禽也楚  
荆也壯荆曼荆也穀楮也栝栢也道梓松也栲  
棗擇柃欄欒也楮榴柰也柎櫟也含桃櫻桃也  
山李崔其蠶也柎檄欒越柎菜莢也椽株也梲  
支也枚棨條也梢校椶柴也藁薪也笱枳又枝

股也柯莖也本幹也肄枿也榑掩蘊柎也僕墮落也木藂生曰榛植棹梨也亲桌也穉柔也柚棒也檉櫟也杆柘也杜仲曼榆也重皮厚朴也木欄桂欄也益智龍睨也山榆母佑也柘榆榎榆也梔子楸桃也宛童寄生槁也秀龍巢也下支謂之柳檨 廣雅

君乘木而王其政昇平則福草生 禮斗威儀

朱草日生一葉至十五日生十五葉十六日一

葉落終而復始 大戴明堂篇

王者德至於地則華華感 雙蓮為華○援神契祥瑞圖

莧藟可以剖鬻朱草可以剖人 化書

恒山有太玄泉神草十九種服之可以度世 五嶽

圖

蓮花一名玉環 三餘帖

昭帝穿淋池廣千步中植分枝荷一莖四葉狀如駢蓋日照則葉低陰根莖若葵之衛足名曰低光荷實如圓珠可以飾佩花葉葳蕤芬馥之氣徹十餘里食之令人口氣常香益脈理病官

人貴之每遊宴出入必皆含嚼或翦以爲衣或折以蔽日以爲戲弄楚辭所謂折菱荷以爲衣意在斯也亦有倒生菱莖如亂絲一花千葉根浮水上實沉沉中名紫泥食之不老帝時命水嬉遊宴永日土人進一豆槽帝曰桂楫松舟其猶重樸况乎此槽可得而乘也乃命以文梓爲船木蘭爲拖刻飛鸞翔鷁飾於船首隨風輕漾畢景忘歸乃至通夜使宮人歌曰秋素景兮泛洪波揮纖手兮折菱荷涼風淒淒揚棹歌雲光

開曙月低河萬歲爲樂豈云多帝乃大悅起商臺於池上及乎末歲進諫者多遂省薄遊幸堦毀池臺鸞舟菱荷隨時廢滅今臺無遺址溝池

已平

拾遺記

靈帝遊於西園起裸遊館千間采綠苔而被堦引渠水以繞砌周流澄澈乘船以遊漾使宮人乘之選玉色輕體以執篙楫搖漾於渠中其水清澄以盛暑之時使舟覆沒視宮人玉色者又奏招商之歌以來涼風也歌曰涼風起今日照

渠青荷晝偃葉夜舒惟日不足樂有餘清絲流  
管歌玉鳧千年萬歲喜難踰池中植蓮大如蓋  
長一丈南國所獻其葉夜舒晝卷一莖有四蓮  
叢生名曰夜舒荷亦云月出則舒也故曰望舒  
荷上

滄州金蓮花研之如泥綵繪與真金無異

杜陽編

西晉長興年中長沙城河陸地生青蓮兩朶官  
司掘得一瓦棺開見一僧形貌儼然其花從舌  
根頂顱出生父老曰昔有一僧誦法華經萬餘

部臨終葬以瓦棺今寺名瓦棺寺

搜神記

王敦在武昌齡下儀仗生蓮花五六月而落上  
右軍日以文翰山水自娛常爲臨川內史置宅  
於城東臨迴溪據層阜時時與賓客遊從溫州  
城外百里皆荷花公乞守其地庭列五馬繡鞍  
金勒每出遊卽控之從南門登舟賞荷花人望  
之如神仙

後主武平中特進侍中崔季舒宅中池內蓮莖  
皆作胡人面仍着鮮卑帽俄而季舒見殺

北齊書

和訶條國在大海之中有大山山有石井井中生千葉白蓮花井邊青石上有四佛足跡合有八跡月六齋日彌勒菩薩與諸天神禮佛跡竟便飛去

支僧載外國事

蘭一名媚世

退居錄

蘭為百草之長葵為百蔬之王

玄覽

帝堯世有金道華種蘭

路史

都梁山有小山山有淳水既清且淺其中悉生蘭草綠葉紫莖芳風藻谷蘭馨遠馥俗謂蘭為

都梁山因以號縣受名焉

盛弘之荊州記

菊有五美焉黃花高懸準天極也純黃不雜后土色也早植晚登君子德也冒霜吐頰象勁直也杯中輕體神仙食也

鍾會賦

酈縣菊花水太尉胡廣久患風羸恒汲飲此水

後疾遂瘳年近百歲

盛弘之荊州記

滎陽郡西有靈源山其澗生靈芝石菌巖有紫

菊

王韶之神境記

康風子服甘菊花栢實散得仙

神仙傳

日精一名更生一名陰成一名朱贏一名女節

草本

葶藶死於盛夏款冬花於嚴寒

董子

將離贈勺藥勺藥一名可離相招贈文無文無

一名當歸欲忘人之憂贈丹棘丹棘一名忘憂

欲蠲人之忿贈青裳青裳一名合歡

古今註

按仙方中自有合離草一名獨搖一名離母所

以為之合離離母者小草為物下根如芋魁有

遊子十二枚周環之去大魁數尺雖相須而實

不連但以氣相屬耳如兔絲之草下有伏兔之

根無此兔在下則絲不得生於上然實不屬也

抱朴子

玉衡星散為萑蒲遠雅頌著倡優則玉衡不明

萑蒲冠環

運斗樞

聖王之世功濟天下者堯也天星降精於庭為

韭感而為萑蒲焉

典術

梁武帝母張氏見萑蒲生花傷人皆不且吞之

已而生帝

梁書

孝文帝南巡至新野臨潭水而見菖蒲花乃歌曰兩菖蒲新野樂遂為建兩菖蒲寺以美之

後魏

典略

宣山中菖蒲一寸二十節堅芬之極

羅浮山記

芙蓉一名水芝丹一名澤芝一名水花

古今註

漢昭帝遊柳池有芙蓉紫色大如斗花葉柔甘

可食芬氣聞十里之內

洞冥記

宋元嘉六年賈道子行荆上明見芙蓉方發聊取還家聞華有聲怪尋得一舍利白如真珠焰

照梁棟

太平御覽

梁元帝竹林堂中多種薔薇康家四出薔薇白

馬寺黑薔薇長沙千葉薔薇多品彙並以長格

校其上使花葉相連其下有十間花屋仰而望

之則枝葉交映迫而察之則芬芳襲人

寰宇記

萱草一名紫萱吳中書生呼為療愁花

述異記

芡一名鴈頭

古今註

鳧伯子常遊翠水之涯采菱而食之

洞冥記

萬蓮葉如鳥翅一名鳥羽一名鳳翼花大者其



色多紅綠紅者紫點綠者紺點俗呼爲仙人花  
一名連纈花 古今註

茱萸別名秋子

有以茱萸令郭璞射之璞曰子如赤鈴玄珠案

文言是茱萸 洞林

露葵蔡朗父名純因名尊菜曰露葵

小荳花名腐婢

和氣勿薄陰陽得理則配玄榮於堂配玄卽今

水僊也 三餘帖

青膚苔也

苔謂之澤葵又名重錢南人呼爲垢草 述異記

垣衣一名昔邪在屋上曰屋遊石上謂之陟釐

草本

萍大者名蘋一名水白一名水簾 上

浮萍一名萍無根而浮江東謂之藻浮於水一

夕生九子故名九子萍

長揚水側生異花路人欲摘者皆當先請不敢

扳取 水經註

樂遊苑自生玫瑰樹樹下多首蓓首蓓一名懷  
風時人或謂之光風風在其間常蕭蕭然日照  
其花有光采故名首蓓為懷風茂陵人謂之連  
枝草

西京雜記

太液池邊皆是雕胡紫穉綠節之類菰之有米  
者長安人謂為雕胡葭蘆之未解葉者謂之紫  
穉菰之有首者謂之綠節其間鳧雛鴈子布滿  
充積又多紫龜綠鼈

永陽縣有山壁立千仞巖上有石室路古名為

神農窟窟前百藥叢茂莫不畢備又別有異藤  
花形似菱菜朝紫中綠晡黃暮青夜赤五色迭

耀

異苑

懸腸草一名思子蔓南中呼為離別草

述異記

太原晉陽以北生屏風草

桂林有睡草見之則令人睡一名醉草亦呼懶  
婦葭出南海也

述異記

寡草特生而不叢

紫述香一名紅蘭香一名金桂香亦名射香草

出蒼梧桂林上郡界今吳中有射香草色似紅藍而甚芳香並上

鴻薺薺之異名

恨山縣山下有石牀傍生野薺人往乞者神許

則風吹制其分齊隨偃而翦不得過越

荆山圖

鄭玄教學處有草如薺而細俗謂康成書帶

三齊

記

老君之御者徐甲少賃於老君後隨老君出關

飯青牛於野老君欲試之乃以吉祥草化為一

美女行至牧牛之所輒以言戲甲甲惑之

真仙通鑑

桃朱術取子帶之令婦人為夫所愛生園中細

如芹花紫子作角以鏡向傍敲之則子自發五

月五日收之也

華夷考

苾芻氏西天草名體性柔軟引蔓旁布馨香遠

聞能療疾不背日光喻出家人

西安覽

霸薰香草名

范子計然

夫須莎也可為蓑笠

詩疏

藟似葛之草一名巨荒

穆木註

高城東南有蒲臺秦始皇東遊海上於臺下蟠  
蒲繫馬至今蒲歲生縈委若有繫狀似水楊可  
爲箭 三齊記

十一月采芴勃芴勃白蒿也白菟食之壽八百  
年 神仙服食經

櫻珠八月之果似桑椹而紅江南俗名水曹淮  
上俗名拍判卽覆盆子也

舜草今之孝草也

葳蕤草一名麗草又呼爲女草江浙中呼草葳

邨悉茗茉莉花皆胡人自西國移植於南海陸  
賈南越行紀云南越之境五穀無味百花不香  
此二花特芳香者緣自胡國移來不隨水土而  
變與夫橘化爲枳異矣 草木狀

火燔野草車轢所致火所不燔俗或喜之名曰  
幸草 王符潜夫論

杜芳藤形不能自立根本緣繞他木作房藤連  
結如羅網相腎然後皮理連合鬱茂成樹 異物志

博士芋蔓生根如鵝鴨卵 風土記

廣博物志 卷之四十一 高麗堂

江淹去故鄉賦北風析兮絳花落流水散兮翠  
筑疎翠筑草名

尹伯奇採棹花以爲食棹花山梨也山梨今名

棠梨其花春開採之日乾漚之可充蔬孝子傳

侯騷蔓生子如雞卵大既甘且冷輕身消酒又

名簡子藤

齊民要術

紫藤葉細長莖如竹根極堅實重重有皮花白  
子黑置酒中歷二三十年亦不腐敗其莖截置  
烟良中經時成紫香可以降神

檉藤依樹蔓生如通草藤也其子紫黑色一名  
象豆三年方熟其殼貯藥歷年不壞生南海解  
諸藥毒

蘭子藤生緣樹木正月二月花色四月五月熟  
實如梨赤如雄雞冠核如魚鱗取生食之淡泊  
甘苦出交趾合浦

野聚藤緣樹木三月花色仍連着實五六月熟  
子大如羹甌里民煮食其味甜酢出蒼梧椒藤  
生金封山鳥潯人往往賣之其色赤又云似草

廣博物志 卷之四十二 高瞻堂  
芝出與古

並上

葭蒲藤類蔓延他樹以自長養子如蓮菽著枝  
葛間一日作扶相連實外有殼裏又無核剥而  
食之煮而曝之甜美食之不饑異物志  
種藤附樹作根軟弱須緣樹而作上下條此藤  
纏裹樹樹死且有惡汁尤令速死也藤緣樹成  
若木自然大者或至十五圍

荊藤圍數寸重於竹可以杖箴以縛船及以爲  
席勝竹也並上

合水藤破之得水行者資以止渴

交州記

荊如楸櫚葉疏外皮青多棘刺高五六丈者如  
五六寸竹小者如筆管竹破其外青皮得白心  
卽荊藤類有十許種續斷草藤也一曰諾藤一  
曰水藤山行渴則斷取汁飲之治人體有損絕  
沐則長髮去地一丈斷之輒便生根至地永不  
死

廣州記

東風華葉似落娠婦莖紫宜肥肉作羹味如酪  
香氣作馬蘭

廣州記

雞侯菜似艾三月乃生宜雞羹故名之並上

符堅將欲南伐夢滿城出菜又地東南傾其占  
曰菜多難為醬也東南傾江左不得平也夢書

新野趙貞家園中種蔥忽一日盡縮入地後經  
歲餘貞之兄弟相次分散搜神記

雍菜生水中可以為菹也廣州記

冬風菜陸生宜配肉作羹也上

蒿子生可食廣志

三廉似翦羽長三四寸皮肥細細色以蜜藏之

味甜酸可以為酒啖出交州正月中熟上

爾雅云菜玉芻郭景純云菜蓐今呼鴟脚莎

爾雅曰出隧蘧蔬音黠郭璞註云蘧蔬似土菌

生菰草中今江東噉之甜滑

爾雅曰鉤芡郭璞註云大如拇指中空莖頭有

臺似薊初生可食

爾雅曰苡菡蓄郭璞註云似小藜赤莖節好生

道傍可食又殺蟲

爾雅曰須薺蕪郭璞註云薺蕪似羊蹄葉細味

酛可食

爾雅曰蒟隱葱郭璞註云似蘇有毛今江東呼為隱葱藏以為菹亦可淪食

爾雅曰蔗蔗郭璞註云蔗卽莓也江東呼蔗莓子似覆盆而大赤酛甜可啖

爾雅曰纂月爾郭璞註云卽紫纂也似蕨可食詩曰纂菜也葉狹長二尺食之微苦卽今英萊也詩曰彼汾沮洳言采其英

一本作莫

爾雅曰菽蚝蚝郭璞註云似葵紫色詩義疏曰

一名芘菜花紫綠色可食似蕪菁微苦陳詩曰視爾如菽

爾雅曰薊鞞竊衣孫炎云似芹江河間食之實如麥兩兩相合有毛着人衣其花着人衣故曰竊衣

爾雅曰蒦菟葵郭璞註云頗似葵而小葉狀如藜有毛洵啖之滑

爾雅曰菌鹿藿其實蒞郭璞註云今鹿豷也葉似大豷而香蔓延生



詩云言采其遂毛云惡菜也詩義疏曰今羊蹄似蘆菹莖赤煮為茹滑而不美多噉令人下痢幽陽謂之遂一名蓐

菹六丑反草似冬藍蒸食之酢字林

蕒而充反木耳也案木耳煮而細切之和以薑橘

可為菹滑美齊民要術

莓二代反草實亦可食

苴音九乾董也並上

斯草生水中其花可食字林

藪菜生水中上

焯菜味辛焯音罕豈菜呂氏春秋曰菜之美者有

雲夢之豈豈胡對反吟菜似蒜生水中芹菜似蒿也

菹菜紫色有滕藪菜葉似竹生水旁慕菜似蕨

藟菜似蕨生水中蕨菜鼈也詩疏曰秦國謂之

蕨齊魯謂之鼈莖菜似蒜生水邊藝菜似蒼荃

菜也一曰深草藝徐鹽反確菜似烏韭而黃確音唯蒼

菜生水中大葉晏術

沈藤生子如齊甌正月華色色仍連著實十月

臘月熟色赤生食之甜酢生交趾

南方草木狀

毗藤生山中大小如苹蔓衍生人採取剥之以作毗

晉安平有越王餘筭菜長尺許白者似骨黑者如角古云越王行海會於舟中作籌筭有餘者棄之於水生焉

合浦有菜名優殿以荳醬茹食之甚香美可食並上

龍鬚菜出菜州繁生海中石上莖如繒長僅尺

許色始青居人取之沃於水乃白又名繒菜人頗珍之又司空山南洗藥池齊張巴山浴丹之所中有龍鬚菜味甘可食日未出浮生水面日出則沒於水中人潔心以往則隨採可得若渾以葷腥苦澁不下咽

彙苑

番禺有菜四葉相對夜合晝開名合歡菜

上

朱提郡有堂狼山山多毒草盛夏之月飛鳥過之不能得去

永昌郡傳

鬼田在竹山縣有地二頃不生樹木惟有茆茨

每歲清明日祭而燎之預十歲之豐歉草盡而

豐

湖廣志

遼東有襄平山多饒鬼目之菜生而有神虎龍

蛇大魚守之雲氣覆之食之令人不饑

榮氏註曰鬼目

菜形似魚守芝草常有氣如龍  
虎蛇魚之狀○遁甲開山圖

光和七年陳留濟陽長垣濟陰東郡寃句離狐  
界中路邊生草悉作人狀操持弓弩牛馬龍蛇  
鳥獸之形黑白各如其色羽毛頭目足翅皆備  
非但彷彿像之尤純舊說曰近草妖也是歲有

黃巾賊起漢遂微弱

搜神記

吳孫亮五鳳元年六月交趾稗草化為稻昔三  
苗將亡五穀變種此草妖也其後亮廢上

咸寧四年立芳蔬園於金墉城東多種異菜有  
菜名曰芸薇類有三種紫色者最繁味辛其根  
爛熳春夏葉密秋蘂冬馥其實若珠五色隨時  
而盛一名芸芝其色紫為上蔬其味辛色黃為  
中蔬其味甘色青者為下蔬其味鹹常以三蔬  
充御膳其葉可以藉飲食以供宗廟祭祀亦止

人饑渴宮人採帶其莖香氣歷日不歇

拾遺記

懷帝末民間園圃皆生蒿棘狐兔遊聚至元熙

元年太史令高堂忠奏熒惑犯紫薇若不早避

當無洛陽乃詔內外四方及京邑諸宮觀林衛

之內及民間園圃皆植紫薇以為厭勝至劉石

姚苻之末此蒿棘不除自絕也

晉書○以下木

木者陽精生於陰故水者木之母也木之為言

觸氣動躍也其字八推十為木八者陰合十者

陽數

元命苞

木名三時草命一歲若椿从春楸从秋榎从夏

所謂木名三時芋从子黃从寅茆从卯菑从酉

菱从亥芋从丁茂从戊芭从巳莘从辛葵从癸

之類命以一歲支幹故曰草命一歲

董子

山中樹能語者非樹語也其精名曰雲陽

抱朴子○

又山中午日稱仙人者老樹也

一使者率白犬野人問居何地曰居龜蓋山隨

至古松而歿松形果如偃蓋使者乃松精犬乃

茯苓

金陵記

今人稱泰山五大夫俱云五松樹而不知始皇  
上泰山封祀風雨暴至休於松樹下遂封其樹  
爲五大夫五大夫秦官名第九爵也

枕譚

天陵偃蓋之松大谷倒生之栢凡此諸木皆與  
天齊其長與地齊其久

抱朴子

千歲松樹四邊枝起上杪不長望而視之有如  
偃蓋其中有物或如青牛或如青羊或如青犬  
或如青人皆壽千歲

松有兩鬣三鬣五鬣者言如馬鬣形

名山記

按老子玉策松脂入地千年變爲茯苓千年變  
爲琥珀千年變爲石膽石膽千年變爲威喜

抱朴子

白鹿真松青牛文梓

枯樹賦

栢曰蒼官

園林記

有青桐赤桐白桐宜琴瑟今雲南牂牁人績以  
爲布

詩義疏

虞氏縣有盧君古塚塚旁栢二株枝條蔭茂二  
百餘畝樹文隱起皆如龜甲根勁如銅石

梧桐斷角馬髦截玉

淮南子

王者任用賢良則梧桐生於東廂

瑞應圖

桐君采藥於桐廬縣山結廬於桐下人問其姓

名自號桐君

惠紹將於東石室自焚臨終謂同學曰吾燒身

處當生梧桐其後三日果生焉

高僧傳

何敬叔少奉佛法作一檀像未有木先夢一沙

門衲衣杖錫來云縣後何家桐甚惜苦求庶可

得如夢求之果獲

夢雋

句章吳平州門前忽生一株青桐樹上有歌謠

之聲平惡而砍殺平隨軍北虜首尾三載死桐

歛自還立於故樹根上聞聲樹顛空中歌云死

樹今再青吳平尋當歸適聞殺此樹已復有光

輝

異苑

嵩山嵩陽觀東古栢五株積翠婆娑可愛中有

一株尤大一石刻曰漢武帝封大將軍

少林集錄

傅大士知梁運將盡救愍兵灾乃然臂為炬冀

禳來禍山有古松傅大士曾於松間願度衆生

以斧爲誓至今松木斧痕猶在其飼虎之餘飯  
棄擲林間化而爲石青白錯雜可作數珠謂之  
飯石至今長存大士傳

秦始皇時終南山有梓樹大數百圍蔭宮中始  
皇惡之興兵伐之天輒大風雨飛沙石人皆疾  
走至夜瘡皆合有一人中風雨傷寒不能去留  
宿夜聞有鬼來問樹言秦王凶暴相伐得不困  
耶樹曰來卽作風雨其奈我何又曰秦王使三  
百人被頭以赤絲繞樹伐汝得無敗乎樹冥然

無聲病人報秦王案言伐之樹斷中有一青牛

出逐之走入河於是秦王立旄頭騎玄中記

桂一名止唾吳氏本草

君乘金而王其政訟平芳桂常生禮斗威儀

閻河之北有紫桂成林其實如棗羣仙餌焉故  
韓終采藥詩云閻河之桂實大如棗得而食之  
後天而死拾遺記

羅浮山頂有桂山海經所謂賁禺之桂羅浮山記

元鳳二年於琳池之南起桂臺以望遠氣有一

履物志 卷之四  
連理桂樹上枝跨於渠水下枝隔岸而南生與上枝同一株 拾遺記

謝康樂集言竹間水際多牡丹

張公嘗言北齊楊子華畫牡丹極分明則知北齊有牡丹矣 古今註

煬帝闢地二百里爲西苑詔天下進花卉易州進二十種牡丹有頰紅鞞紅飛來紅袁家紅醉妃紅雲紅天外紅一拂黃軟條黃延安黃先春紅顫風嬌等名 海記

桑木者箕星之精神木也虫食葉爲文章人食之老翁爲小童 典術

神農耕桑得利究年受福 孝經援神契

伊尹母孕行汲水化爲枯松其夫尋至水濱見桑空中有兒乃收養之 書大傳

按春秋孔演圖孔子亦生於空桑

惜烏先生避世於芒尚山其子居焉化民食桑三十七年以絲自裹九年生翼九年而死其桑長千仞蓋蠶類也去瑯琊二萬六千里 括地圖



南方赤帝女學道得仙居高陽嶧山桑樹上正月一日銜柴作巢至十五日成或作白鵲或作女人赤帝見之悲慟誘之不得以火焚之女卽昇天因名帝女桑

廣異記

孝懷帝永嘉二年冬項縣桑樹有聲如解材人謂之桑樹哭按劉向說桑者喪也又爲哭聲不祥之甚

晉書

張華所封壯武郡有桑化爲栢識者以爲不祥

楊圓葉弱帶一曰高飛一名獨搖

古今註

大業中帝開汴渠兩隄上栽垂柳詔民間有柳一株賞一縑百姓競獻之又令親種帝自種一株羣臣次第種方及百姓時有童謠云天子先栽然後百姓栽

河記

大業九年煬帝將再幸江都有迷樓官人夜歌云河南楊柳樹河北李桃榮楊花飛去去何處李花結果自然成帝披衣起聽召宮女問之孰使汝歌也汝自爲之耶宮女曰臣有弟在民間

曰道途兒童多唱此帝默然久之曰天啓之也  
因索酒自爲歌曰宮木陰濃燕子飛興衰自古  
漫成悲他日迷樓更好景官中吐艷變紅輝後  
帝幸江都唐帝起兵入京焚迷樓火經月不滅  
柠一作楮木之寔之赤者餌之一年老者還少令  
人徹視見鬼昔道士梁須年七十乃服之轉更  
少至年百四十歲能夜書行及奔馬後入青龍

山去

抱朴子

杉一名披姑合浦東二百里有杉一樹漢安帝  
永初五年春葉落隨風飄入洛陽城其葉大常  
杉數十倍術士廉盛曰合浦東杉葉也此休徵  
當出王者帝遣使驗之信然草木狀

槐榆與橘柚合爲兄弟有苗與三危同爲一家  
淮南子

棗雞口槐兔目桑鼃眼榆負瘤雜木鼠耳

晉陵都城北角有槐木一日之間三榮三悴

侯白嘗與楊素並馬言話路傍有槐樹顛顛死  
素乃曰侯秀才理道過人能令此樹活否曰能

素云何計得活曰取槐樹子於樹枝上懸着卽當自活素云因何得活答曰可不聞論語云子在回關中人槐何敢死素大笑廣記

交趾定安縣有木綿樹高丈餘實如酒杯口有綿如蠶之綿也又可作布名曰白縹一名毛布又云交趾有穰木其皮中有如白米屑者乾擣之以水淋之似麪可作餅吳錄

合歡似梧桐枝葉互相結風來解使人不忿嵇康種之於舍前古今註

日給之花似柰柰實而日給虛虛偽之與真實相似也杜恕篤論

顧渚山有櫨汝耿反子樹其木如玉色渚人採之以爲杖述異記

辰州嵩溪有丹青樹枝葉直上籠雲下無枝條上有五色葉圓如華蓋故號丹青樹俗謂之五采樹今在辰州辰陽縣上

楓香樹似白楊葉圓而岐分有脂而香其子大如鴨卵二月花發乃著實八九月熟曝乾可燒

惟九真郡有之

南方草木狀

榕樹南海桂林多植之葉如木麻實如冬青樹幹拳曲是不可以爲器也其本稜理而深是不可以爲材也燒之無焰是不可以爲薪也以其不材故能久而無傷其蔭十晦故人以爲息焉而又枝條旣繁葉又茂細軟條如藤垂下漸漸及地藤梢入地便生根節或一大株有根四五處而橫枝及隣樹卽連理南人以爲常不謂之瑞木

上

日御北至夏德南宣王蒸榮心氣動上玄謂之

珍樹含艷丹閑

王蒸木槿也  
○王延之贊

木槿夕死朝榮士亦不長貧也

東方朔與丞相公孫弘書

程雅問櫨木名曰無患何也答曰昔有神巫曰寶眊能以符効百鬼得鬼則以此木爲棒棒殺之世人競取此爲器以厭却邪魅故號曰無患

古今註

五嶺楓木歲久生癭遇雷雨暗長三五尺謂之楓人取之作術有通神之驗取之不以法則化

而去之不可得

南方草木狀

有樹名獨根分爲二枝其東向一枝是木威樹南向一枝是橄欖樹

金樓子

櫻櫚一名鬣葵

丹鉛錄

繫迷駁馬皆木也

詩疏

人參千歲爲小兒枸杞千歲爲犬子楓脂千歲爲琥珀

玄覽

模木生周公塚上其葉春青夏赤秋白冬黑以色得其正也楷木生孔子塚上其餘枝疎而不

屈以質得其直也

淮南王草木譜

曲阜縣南十里有孔子春秋臺曲阜古城有顏回墓墓上石楠縣樹二株可三四十圍士人云

顏回手植

述異記

孔子冢坐中樹數百皆異種魯人代代無能名者人傳言孔子弟子異國人持其國樹來種之故有柞枌雜離女貞五味旃檀之樹

皇覽冢記

古有神婦負土欲塞谷繩絕墜負柙木因成二樹其大數圍

秦州記

文種曰吳王好起宮室用工不輟王選名山神木奉而獻之越王乃使木工三千餘人入山伐木一年作工思歸皆有怨望之心而歌木客之吟一夜天生神木一雙大二十圍長五十尋陽爲文梓陰爲榎楠巧工施校制以規繩雕治圓轉刻削磨礪分以丹青錯畫文章嬰以白璧鏤以黃金狀類龍虵文彩生光乃使大夫種獻之於吳王曰東海役臣孤勾踐使臣種敢因下吏聞於左右賴大王之力竊爲小殿有餘材謹再

拜獻之吳王大悅

吳越春秋

戰國時諸侯苦秦之難有民從征伐秦不返其妻思之而卒既葬塚上生木枝葉皆向夫所在而傾因謂之相思木

述異記

昔有一人好道而不知求道之方唯朝夕拜跪向一枯樹輒云乞長生如此二十八年不倦枯木一旦忽生花花又有汁甜如蜜有人教令食之遂取此花及汁並食之食訖卽仙

獨異志

徐孺子與郭林宗遊學同稚還家林宗庭有一

樹欲伐去之稚乃問其故林宗曰爲宅之法方正如口口中有木困字不祥也是以去之稚難林宗曰爲宅之法方正如口口中有人囚字豈可居之林宗默然無對

御覽

桂陽太守江夏張遼叔高去隰令家居買田田中有大樹十餘圍扶疏蓋數畝地播不生穀遣客伐之六七血出客驚怖歸具事白叔高大怒老樹汁出此何等血因自嚴行復斫之血大流灑叔高使先斫其枝上有一空處白頭公可長

四五尺忽出往赴叔高高乃逆格之凡殺四頭左右皆怖伏地而叔高恬如也徐熟視非人非獸也遂伐其木其年應司空辟侍御史兗州刺史以二千石之尊過鄉里薦祝祖考白日繡衣榮羨如此其禍安居春秋國語曰木石之怪夔魍魎物惡能害人乎

異苑

李正字弘卿學道見東王公教之十七年後忽身死家人埋之於武陵而塚上生花樹高七尺有人遇見此花皆聰明盛文章

武陵上十仙傳

廣博物志 卷之二十三 高邱堂  
邠原常行遼東得遺錢拾以繫樹枝此錢既不  
見取而繫錢者多原問其故答曰謂之神樹原  
惡其由已而成淫祀乃辨之里中遂斂其錢以  
爲社供 別傳

建安二十五年正月魏武在洛陽起建始殿伐  
濯龍樹而血出又掘徙梨根傷而血出魏武惡  
之遂寢疾是月崩 搜神記

靈帝熹平中有樗樹暴長丈餘大一圍作胡人  
狀頭目鬚髮皆具京房易傳曰王德衰下人將

起則有木人之狀

後漢書

熹平中長安空樹中有人面生鬚 上

無錫縣有四株茱萸樹相摻而生狀若連理先  
是郭景純筮延陵蝮鼠遇臨之益曰後當復有  
妖樹生若瑞而非辛螫之木也倘有此東西數  
百里必有作逆者及此木生其後徐馥果作亂  
亦草妖也 晉書

王梵志衛州黎陽人也黎陽城東十五里有王  
德祖當隋文帝時家有林檎樹生瘦大如斗經



三年朽爛德祖見之乃剖其皮遂見一孩兒抱  
胎而德祖收養之至七歲能語曰誰人育我德  
祖具以實語之因名曰林木梵天後改曰梵志  
曰王家育我可姓王也梵志乃作詩示人甚有  
義旨 史遺

昔有國王有一好樹高廣極大當生勝果香而  
甜美時有一人來至王所王語之言此樹之上  
將生美果汝能食不卽答王言此樹高廣雖欲  
食之何由能得卽便斷樹望得其果旣無所獲  
徒自勞苦後還欲監樹已枯死都無生理世間  
之人亦復如是如來法王有特戒樹修諸功行  
不解方便反毀其禁如彼伐樹復欲還活都不  
可得破戒之人亦復如是 百喻經

昔迦毘羅國梵摩淨德長者園樹生耳如菌取  
而食之隨取隨長迦那提婆尊者至其家長者  
問菌所自尊者曰汝家曾供養一比丘道眼不  
明虛沾信施報爲木菌乃說偈曰入道不通理  
復身還信施汝年八十一此樹不生耳長者年

廣博物志

卷之四十二

五

八十一 樹果不生菌

法苑珠林

廣博物志卷之四十二

國家圖書館, NATIONAL CENTRAL LIBRARY, TAIWAN, R.O.C.

廣博物志卷之四十三

隴西董斯張纂

郡人唐世濟訂

草木下

果

瓜

竹

異草

異木

古公亶父始接菓木晉王愷始接花卉

物原

初修上林苑群臣遠方各獻名果異樹亦有製

為美名以表奇麗○梨十紫梨青梨

寔大寔小芳梨

大谷梨細葉梨縹葉梨金葉梨

出琅琊王野家太守王唐所獻

瀚海梨

出瀚海北耐寒不枯

東王梨

出海中

紫條梨○棗七

弱枝棗玉門棗棠棗青華棗枏棗赤心棗西王

棗出崑崙山○栗四侯栗榛栗瑰栗嶧陽栗嶧陽都尉曹彪

所獻大如拳○桃十秦桃桴桃緗核桃金城桃綺葉

桃紫文桃霜桃霜下可食胡桃出西域櫻桃含桃○李

十五紫李綠李朱李黃李青綺李青房李同心

李車下李含枝李金枝李顏淵李出魯羗李燕李

蠻李侯李○柰三白柰紫柰花紫色綠柰花綠色○

查三蠻查羗查猴查○柀三青柀青葉柀烏柀

○棠四赤棠白棠青棠沙棠○梅七朱梅紫葉

梅紫花梅同心梅麗枝梅燕梅猴梅○杏二文

杏材有文采蓬萊杏東郭都尉于吉所獻一枝花花襍五色六出云是仙人所食○西

京襍記春秋斗運樞曰玉衡星散為李又散為桃散為

椒散為荆又曰璇樞星散為橘

東方有三尺之桃食之壽短神異經

得綏山一桃雖不能仙亦足以豪列仙傳

陶真君曰服三樹桃花盡則面色如桃花桃膠

服之可仙桃終冬不落者為桃臬亦云桃奴桃

廣博物志 卷之三 三〇

屬 蠹亦可食能悅人顏色又海上有偏桃人亦果

秦吏以私恨告民吳旦生盜食宗廟御桃旦生對曰民不敢食也王曰剖其腹出其桃史記惡而書之曰食桃之肉當有遺核王不知此而剖

人腹以求桃非理也 鍾離意別傳

梅一種一帶結雙寔名爲鴛鴦梅 華夷考

邺鄆有故宮基存焉中有趙王之果園梅李至

冬而花春得而食 述異記

豹祠赤杏銅馬朱櫻房陵緇李 王廙洛都賦

番禺有酸柿甜梅李又果賦云梅甜柿酸 述異記

西王母居龍月城中產黃中李花實上皆有黃

中二字王母惜之過於蟠桃 集真記

五雲丹山上有玄雲之李食之得仙 真人王褒內傳

李有黃建李青皮李馬肝李冬李十一月熟 廣志

瀨鄉老子祠有紫石榴紅縹李一李二色

南居細李四月先熟 風土記

朔與弟子俱行朔渴令弟子叩道邊家門不知

室主姓名呼不應朔復往見博勞飛集其家李樹上朔謂弟子曰主人當姓李名博勞汝呼當應室中人果有姓李名博勞出與朔相見即入取飲與之東方朔占○附高僧傳曰釋道安與弟子惠遠等四百餘人渡河南遊夜行值雷雨乘電光而進前行得人家見門裡有一馬柳柳之間懸一馬兜可容一斛安使呼林百升主人驚出果姓林名百升謂是神人厚相賞接既而弟子問何以知其姓字安曰兩木為林兜容百升也

魏文帝安陽殿前天降朱李八枚啖一枚數日不食今李種有安陽李大而有甘者即其種也

述異記

安丘望之病篤弟子公沙都來省之與安丘共坐庭樹下安丘曉然有痊聞李香開目見雙赤李著枯枝都仰手承李自墮掌中安丘食之所

苦除盡嵇康高士傳

楊惛幼時學庭有李樹寔落群兒爭取唯惛頽然獨坐季父暉見而異之遂為惛別葺一室命處其中以銅盤具盛饌而飯焉因謂諸子曰汝輩若能如遵彥便得竹林別室銅盤重肉之食

北史

杏木者東方歲星之精典術

濟南郡之東南有分流山山上多杏大如梨黃

如橘土人謂之漢帝杏亦曰金杏雜俎

滎陽有白杏廣志

僊人有三玄紫杏南岳夫人傳

東海郡尉于台有杏一枝花雜五色六出號六

仙人杏述異記

上林苑有蓬萊杏西京雜記

北齊武帝改芳林園為仙都苑植名果有合歡

杏同心李花木錄

有紫柰大如斗甜如蜜核紫花青研之有汁如

漆可染衣其汁着衣不可滌浣亦名闔衣柰

夏禹詣鍾山啖紫柰醉金酒服靈寔行九真而

猶莖於會稽真誥

卽夕殿中虎賁宣詔賜臣冬柰一奩詔使温啖

夜非食時而賜見及柰以夏熟今則冬至物以

非時為珍恩以絕口為厚詔曰此柰從梁州來

道里既遠又來東轉暖故稍變色不佳耳

曹植表

西旅獻崑山之蒲桃北燕薦朔濱之巨栗

王逸荔枝賦

穀城紫棗長二寸西王母棗三月熟在衆果之

先廣記

有三皇棗駢白棗灌棗又有岐廉棗桂棗夕棗

上

郭璞云棗細腰者今謂之鹿盧棗

正月一日日出時反斧班駁椎之名嫁棗不椎

則花無寔子易零落也

齊民要術

信都獻仲思棗四百枚長四五寸正紫色齊時

有山人仲思得此棗種之因以為名

大業拾遺

玄瓠灣中有地數頃土有栗園栗小殊不竝固

安之寔也然歲貢三百石以充天府水渚即栗

洲也樹木高茂望若屯雲積氣矣林中有栗堂

射埽甚閑敞牧宰及英彥多所遊薄

水經

拂菻南有國曰磨鄰人食鶻莽鶻莽波斯棗也

西域傳

鐘山之棗其大如餅

魯女生列傳



列玉門之棗酌葡萄之醴

漢武內傳

北方有七尺之棗南方有三尺之梨

鮑焦耕田而食穿井而飲非妻所織不衣餓於

山中食棗或問之此棗子所種耶遂嘔吐立枯

而死

風俗通

景公謂晏子曰東漢之中有水而赤其中有棗

華而不寔何也晏子對曰昔者秦穆公乘龍而

理天下以黃布裹烝棗至東海而捐其布彼黃

布故水亦烝棗故華而不寔

晏子

秦大饑應侯請發五苑果棗粟以活民

韓子

西王母進洞淵紅藟嶸州甜雪崑流素蓮陰岐

黑棗其樹百尋寔長二尺核細而柔百年一熟

拾遺記

嶸嶸細棗出嶸嶸山山臨碧海上萬年一寔如

今之軟棗咋之有膏膏可燃燈西王母握以獻

帝

洞冥記

孟節能含棗核不食可至十年

後漢書

石虎園有西王母棗味絕美枝葉忽茂四時不

凋九月生花十二月乃熟三子一尺又有羊角

棗亦三子一尺

鄴中記

沙門竺惠猷太元二年夜夢讀詩五百首其一

篇後曰陌南酸棗樹名爲六奇木遣人以伐取

載還柱馬屋

異苑

晉太元中南郡忻

一作州字

陵縣有棗樹一年忽生

桃李棗三種花

上

光祿卿李郁因晝寢夢食巨棗覺而有疾謂其親友曰嘗聞棗重來呼魂之象今予神氣逼抑

將不免乎未幾而卒

晉書

晉陽館中有一蠕蠕客館胡沙門指語綦母懷文云此人有異筭術時庭中棗樹方寔令布筭卽知其數并赤白若干唯少一子筭者曰必不少但更撼之果落一寔

神僧傳

一日明霞院美人楊夫人喜報帝曰酸棗邑所進玉李一夕忽長清陰數畝帝沈默甚久曰何故而忽茂夫人云是夕院中人聞空中若有千百人語言云李木當茂洎曉看之已茂盛如此

帝欲伐去左右或奏曰水德來助之應也又一  
夕晨光院周夫人來奏云院中楊梅一夕忽然  
繁盛帝喜問曰楊梅之茂能如玉李乎楊梅雖  
茂終不敵玉李之盛帝往兩院觀之亦自見玉  
李繁茂後梅李同時結寔院妃來獻帝問二果  
孰勝院妃曰楊梅雖好味頗清酸終不若玉李  
之其苑中人多好玉李帝嘆曰惡梅好李豈人  
情哉天意乎

海山記

紫清九華真妃手中先握二枚棗色如乾棗而

形長大內無核亦不作棗味有似於梨味耳

真誥

扶桑國有赤梨經年不壞

齊書

恒陽黃梨巫山朱橘

七誨

太上之藥果有玄光梨

漢武內傳

梨則大谷冬熟張公秋黃

洛都

謝眺謝梨啟曰味出靈關之陰旨珍玉津

之萃

塗山梨大如升色紫千年一花亦曰紫輕梨

祝融峯上有碧玉壇方五尺東有紫梨高三百

尺乃夏禹所植寔大如斗赤如日若得食長生

不死 真仙通鑑

雲陽宮記曰雲陽車箱坂下有梨園一頃梨數百株青翠繁密望之如車蓋 三輔黃圖

宋秦始既失彭城江南始傳種消梨先時所無百姓爭欲種植識者曰當有姓蕭而來者十餘年齊受禪 南齊書

安公講僧常數百習彥威曾餉十梨值安開講安便於座中手自剖分梨盡人徧都無頗偏 僧神傳

玉乳梨煬帝時有之 華夷花木考

魏高聰以高肇之黨彈廢於家斷絕人事唯修營園果世稱高聰梨以為珍異 北史

橘見屍而寔繁榴得骸而葉茂 張華感應類從志

橘柚冬生而人曰冬死歿者眾薺麥夏死而人曰夏生生者眾 繁露

扶桑東五萬里有磅礴山上有樹樹百圍其花青黑萬歲一寔鬱水在磅礴山東其水小流在大陂之下所謂沉泉亦名重泉生碧藕長千常

七尺為常也條陽山出神蓬如蒿長十丈周初  
國人獻之周以為宮柱所謂蒿宮也中有白橘  
花色翠而寔白大如瓜香聞數里

拾遺記

越中有王氏之橘園胡氏之梅山賀氏之瓜丘  
吳中有陸家白蓮顧家班竹趙有韓氏之酸棗

述異記

勾漏縣有白橘青椒縹杏

越人多橘稅謂之橙橘戶

並上

交趾有橘官長一人秩二百石主歲貢御橘

司馬相如作賦不知盧橘為枇杷鄭玄注禮不

知橘之非梨

餘冬錄

景公使晏子使於楚楚王進橘置削晏子不剖  
而并食之楚王曰橘當去剖晏子對曰臣聞之  
賜人主前者瓜桃不削橘柚不剖今萬乘無教  
臣不敢剖然臣非不知也

說苑

楊由字哀侯習占侯為郡文學椽時有風吹稍  
哺太守以問由由曰方當有薦木寔者其色黃  
赤頃之五官椽獻橘數包

後漢書

漢章帝元年上虞縣獻二蒂瓜玉色橘述異記

吳黃武中交趾太守士燮獻橘十七寔同一蒂

以爲瑞異群臣畢賀南方州木狀

王靈之年十三喪父二十年鹽醋不入口被病

在牀忽有一人來問病謂之曰食橘當差俄而

不見庭中橘樹隆冬乃有三寔食之病尋愈以

爲至孝所感俗說

梁使徐君房與魏使陳昭各言方物昭問君房

葡萄味何如橘柚答曰津液奇勝芬芳減之君

房曰金衣素裏見包作貢向齒自消良應不及

談藪

陳後主夢黃衣人圍城繞城橘盡伐去之及隋

兵至上下通服黃衣廣五行記

有巴邛人家有橘因霜後諸橘盡收餘二大橘

如三四斗益巴人卽令扳摘輕重亦如常橘剖

開每橘有二老叟鬚眉浩然肌體紅明皆相對

象戲身尺餘談笑自若但與決賭訖一幅絳臺

山霞寔散二劑一叟曰君輸我瀛洲玉塵九斛

阿母療髓凝酒四種阿母女熊盈娘子躋虛龍  
縞襪八納後曰于先生青城艸堂還我耳又有  
一叟曰王先生許來竟待不得橘中之樂不減  
商山但不得深根固蒂於橘中耳有一叟曰僕  
肌虛矣瀆龍根脯食之卽於袖中抽出一草根  
方圓徑寸形狀宛轉如龍毫釐罔不周悉因削  
食之隨削隨滿食訖以水嚙之化爲一龍二叟  
共乘之足下泄泄雲起瀆叟風雨晦冥不知所  
在

幽明錄

其果寔之珍者樹有荔枝蔓有辛蒟園有芳藟  
香茗給客橙葵其藥物之異者有巴戟天椒竹  
木之瓊者有桃枝靈壽

華陽國志

南中橙柑青烏所食始霜之日採之風味照座  
擘之香霧喫人皮薄而味珍脉不沾膚食不留  
滓茸踰萍寔冷亞冰壺

劉季標啟

罰士有給客橙似橘而非若柚而香冬夏華寔  
相繼通歲食之亦名盧橘

花木志

丹陽張盤字子石爲廬江太守潯陽令嘗餉一

奩枱其小男年七歲就取一枚盤奪其枱外卒以兩枚與之盤奪兒枱鞭卒曰何故行賂於吾子

晉書

南康郡南東望山有三人入山見山頂有果樹衆果畢植行列整齊枱子正熟三人共食致飽乃懷二枚欲出示人聞空中語云催放雙枱乃聽汝去

搜神記

河內司馬元胤元嘉中爲新釜令喪官月旦設祭枱化而爲鳶

異苑

舊南海獻龍眼荔枝十里一置五里一侯奔騰阻險死者繼路和帝時臨武長汝南唐羗以縣接南海乃上書諫曰臣聞上不以滋味爲德下不以貢膳爲功故天子食太牢爲尊不以果寔爲珍伏見交趾七郡獻生龍眼等鳥驚風發南州土地惡蟲猛獸不絕於路至於觸犯死亡之害死者不可復生來者猶可救也此二物升殿未必延年益壽帝於是下詔曰遠國珍羞本以薦奉宗廟苟有傷害豈有愛民之本其勅太官



勿復受獻由是遂省焉

謝承書

楊沛為新鄭長課民蓄桑椹太祖西迎天子軍

無糧沛乃進乾椹後為鄴令

魏畧

北方有白桑椹長數寸食之其美

異苑

漢興平元年九月桑再椹時劉玄德軍於沛年

荒穀貴士眾皆饑仰以為糧

太元中太原王戎為鬱林太守泊船新亭眠夢

有人以七枚椹子與之著衣襟中既覺得之占

曰椹桑子也自後男女大小凡七喪

並上

南荒山有甘蔗之林其高百丈圍三尺八寸促

節多汁甜如蜜咋嚼其汁令人潤澤可以節虺

虫人腹中虺虫其狀如蚓此消穀虫也多則傷

人少則穀不消是甘蔗能減多益少

神異經

扶南甘蔗一丈三節白日炙便銷清風吹即折

安定之梨皮薄味厚一歲三花一枚二升

梁吳均食移

蔗有二種赤者名崑崙蔗白者名荻蔗

昔有二人共種甘蔗而作誓言種好者賞其不

好者當重罰之時二人中一者念言甘蔗極甜

若壓取汁還灌甘蔗樹必得勝既取汁溉冀望  
滋味反敗種子所有甘蔗一切都失世人亦爾  
欲求善福恃已豪貴倚形挾勢逼脇下民陵奪  
財物用作福善不知將來反獲其殃如壓甘蔗  
彼此都失

法苑珠林

劉涓母答國書曰胡桃本生西羗外剛樸內柔  
其質似古賢欲以奉貢

晉書

昔者舍衛國有一貧家庭中有蒲萄樹上有數  
穗念施道人時國王先前請食一月是貧家力  
勢不如王正懸一月乃得一道人便持施之語  
道人言念欲施來已經一月今乃得願道人語  
優婆夷已一月中施優婆夷言我但施一穗蒲  
萄邠得一月施耶道人言但一月中念欲捨施  
則爲一月也

雜譬喻經

陸機與弟雲書曰張騫使外國十八年得塗林  
安石榴亦名丹若甜者謂之天漿

石榴之寔醉三尸拾櫨之木厭邪鬼

玄覽

林檎一名來禽

郭文在山間有石榴楊梅等花爲樵牧所傷文  
賣簪沽酒以澆花樹人問之曰爲二子洗瘡止  
痛粟苑

果有隱夫木有女貞

益智子如筆毫長七八分二月花色若蓮著寔  
五六月熟味辛雜五味中芬芳亦可鹽曝出交  
趾合浦建安八年交州刺史張津嘗以益智子  
粽餉魏武帝南方草木狀

古度樹不花而寔寔從皮中出大如安石榴色

赤可食其寔中如有蒲藜者取之爲粽數日不  
煮皆化成虫如蟻有翼穿皮飛出著屋正黑齊記

千歲子一苞二百餘顆皮殼青黃色殼中有肉

如栗味亦如之出交趾雲南志

留求子形如梔子稜瓣深而兩頭尖似訶梨勒

而徑及半黃已熟中有肉白色其如棗核大治

嬰孺之疾草木狀

楊桃似橄欖其味甜五月十月熟諺曰楊桃無

蹶一歲三熟其色青黃核如棗核異物志

編樹堃生三月花色仍連著寔五六月成子及握煮投下魚雞鴨羹中好亦出鹽藏出交趾武平草木狀

州樹野生二月花色仍連著寔及握煮如李子五月熟剥核滋味甜出武平南方記

前樹堃生二月花色連青寔如手指長三寸五六月熟以湯滴之削去核食以糟鹽藏之味辛可食出交趾

石南樹野生二月花色仍連著寔寔如鷲卵七

八月夔人採之取核乾其皮中作肥魚羹和之尤美出九真

國樹子如鴈卵野生三月花色連著寔九月熟曝乾訖剥殼取食之味似栗出交趾並上

款似栗赤色子大如栗殼有棘刺破其外皮內白如脂肪著核不離味甜酢核似荔枝廣州記

繁多樹不花而結寔寔從皮中出自根著子至杪如橘大食之過熟內許生蜜一樹者皆有數十嵩山記曰嵩寺忽有思惟樹卽貝多也有人

坐貝多樹下思惟因以名焉漢道士從外國來  
將子於山西脚下種極高大今有四樹一年三

花

裴淵廣  
州記

緗葉子並似椒味如羅勒嶺北呼爲木羅勒

廣州  
記

枳椇葉似蒲柳子似珊瑚其味如蜜十月熟樹  
乾者美出南方邳邳枳椇大如指

廣志

木豆出徐門子美似烏豆枝葉類柳一年種數  
年採

廣州記

楮樹子似桃寔二月花色連著寔七八月熟  
藏之味辛出交趾

南方記

檉樹子如桃寔長寸餘二月花色連著寔五月  
熟色黃鹽藏味酸似白梅出九真

上

梓椈大十圍材貞勁非利剛截不能尅堪作船  
其寔類棗著枝葉重曝挽垂刻鏤其皮藏味美  
於諸樹

異物志

五子樹寔如梨裡有五核因名五子治霍亂金

瘡

裴淵廣  
州記

白緣樹高丈餘寔味甘美於胡桃交州記

都昆樹野生二月花色仍連著寔八九月熟如

雞卵里氏取食之皮核滋味醋出九真交趾草

狀

關桃子其味酸士翁子如漆子大熟時甜酸其

色青黑枸槽子如指頭大正赤其味甘雞橘子

大如指味甘永寧界中有之猴總子如小指頭

大與柿相似其味不減於柿多南子如指大其

色紫味甘與梅子相似出晉安王壇子如棗大

其味甘出侯官越王祭太乙壇邊有此果無知

其名因見生處遂名王壇其形小於龍眼臨海

異物志

劉樹子大如李寔三月花色仍連著寔七八月

熟其色黃其味酢煮蜜藏之仍其好草木狀

鬱一名雀李又名車下李又名郁李亦名棣亦

名菓李毛詩七月食鬱及菓廣雅

椰二月花色仍連著寔房相連累房三十或二

十七八子十一月十二月熟其樹黃寔俗名之

爲丹也橫破之可作椀或微長如括萁子從破之可作爲爵

草木狀

鬼目樹大者如李小者如鴨子二月花色仍連著寔七八月熟其色黃味酸以蜜煮之滋味柔嘉交趾武平興古元真有之也

橄欖子大如棗大如雞子二月花色仍連著寔八月九月熟生食味酢蜜藏仍甜

並上

博羅縣有合成樹十圍去地二丈分爲三衢東向一衢木葉似練子如橄欖而硬去皮南人以爲糝南向一衢橄欖西向一衢三丈三丈樹嶺北之候也

南越志

荔支樹高五六丈如桂樹綠葉蓬蓬冬夏鬱茂青華朱寔寔大如雞子核黃黑似熟蓮子寔白如肪其而多汁似安石榴有甜酢者夏至日將已時翕然俱赤則可食也一樹下子百斛捷爲焚道南廣荔支熟時百鳥肥其名之曰焦核小次日春花次日曰胡偈此三種爲美似鼈卵大而酸以爲醢和率生稻田間

廣志

桶子大如雞卵三月花色仍連著寔八九月熟  
採取鹽酸漚之其味酸醋以蜜藏滋味甜美出  
交趾草木狀

山檳榔一名蒟子幹似蔗葉類柞一叢千餘幹  
幹生十房房底數百子四月採法真登羅浮山疏

豆蔻樹大如李二月花色仍連著寔子相連累  
其核根芬芳成殼七月八月熟曝乾剥食核味

辛香五味出興古草木狀

植查子甚酢出西方廣志

餘柑大小如彈丸視之理如定陶瓜初入口苦  
澁咽之口中乃更甜美足味鹽蒸尤美可多食

異物志

芭蕉葉大如筵席其莖如茅取蕉而煮之則如  
絲可紡績女工以爲絺綌則今交趾葛也其內  
心如蒜鵠頭生大如今拌因爲寔房著其心齊  
一房有數拾枚其寔皮赤如火剖之中黑剥其  
皮食其肉如鉛蜜甚美食之四五枚可飽而餘  
滋味猶在齒牙間一名甘蕉上



扶留木根大如著視之似柳根又有蛤名古黃生水中下燒以爲灰曰牡礪粉先以檳榔著口中又取扶留藤長一寸古黃灰少許同嚼之除

胸中惡氣 蜀記

蠶薺子如彈丸 魏武帝食品

其儲蓋薯蕷之類或云芋類根葉亦同其寔如拳有大如甌者皮紫而肉白蒸鬻食之味如薯蕷性不甚冷舊珠崖海中人不耕稼惟種其儲秋熟收蒸煦切如米粒囤貯以充糧糗是名儲

糧佐筵如粳粟然海人食此皆壽百餘歲 草木狀

雀芋狀如雀頭置乾地反濕置濕地反乾飛鳥

觸之墮走獸遇之僵 神異經○以下瓜

大霍山下有洞臺司命君之府也中有神靈瓜

食之心通至玄 黃庭注

有龍肝瓜長一尺花紅葉素生於冰谷所謂冰谷素葉之瓜仙人瑕丘仲得此瓜食之千歲不

渴 洞冥記

西王母仙家上藥有空同靈瓜 漢武內傳

有青燈瓜大如三斗魁玄表丹裹呈素含紅攬  
之者壽食之者仙神仙傳

瓜之所出以遼東廬江燉煌之種爲美有鳥瓜

有魚瓜

廣志

龍蹄獸掌羊髓兔頭皆瓜屬又金釵虎蟠白觚  
玄肝素腕並陸機賦中瓜名也上

煬帝改胡牀爲交床胡瓜爲白露黃瓜改茄子

爲崑崙紫瓜

大業拾遺

鞞鞞國西瓜一枚用二人舉之

瀛涯勝覽

初刑史子臣謂朱素公從今已往五祀五日臣  
死後五年五月丁亥吳亡以後五祀八月辛巳  
君薨刑史子臣至死日朝見素公夕而死後吳  
亡素公懼思刑史子臣之言將至死日乃逃於  
瓜圃死之求得已也古文瑣語

秦始皇密令人種瓜於驪山硎谷中温處瓜寔  
成使人上書曰瓜冬有寔有詔下博士諸生說  
之人人各異則皆使往視之而爲伏機諸儒生  
皆至方相難不決因發機從上填之以土皆壓

死

古文奇字

衛國縣西南有瓜穴冬夏常出水望之如練時有瓜葉出焉相傳苻秦時有李班者頗好道術入穴中行可三百步廓然有宮宇牀榻上有經書見二人對坐鬚髮皓白班前拜於牀下一人顧曰卿可還無宜久住班辭出至穴口有瓜數箇欲取乃化爲石尋故道得還至家家人云班去來已經四十年矣

谿父者南郡鄱人也居山間有仙人常止其家

從買瓜教之鍊瓜子與桂附子芷寔共藏而對

分食之二十餘年能飛走升山入水

列仙傳

明帝陰貴人夢食瓜甚美帝使求諸方國時燉煌獻異瓜種恒山獻巨桃核瓜名穹隆長三尺而形屈曲味美如飴帝使植於霜林園園皆植寒果積冰之節百果方盛俗謂之相陵與霜林之聲訛也后崩內侍者見鏡奩中有瓜桃之核

拾遺

記

吳桓王時會稽生五色瓜今吳中有五色瓜歲

充貢賦

述異記

鄭灼字茂顯勵志好學多苦心執若瓜時輒偃臥以瓜鎮心起便讀誦其篤志如此

南史

後魏宋瓊母病冬月思瓜瓊夢見人與瓜覺得之手中時稱孝感

夢雋

焦華父遺病甚冬月思瓜華夢一人黃冠謂曰聞子病父思瓜故送子瓜華拜而受及寤在手瓜香異甚父食瓜而病愈

上

豫章有廬松村郡人羅根生來此村側墾荒種瓜果園中有一神壇瓜始引蔓忽見壇上有一新板墨書云此是神地可速出去根生祝曰審是神教願更朱書賜報明早往看向板猶存字悉以朱代墨根生謝而去也

述異記

韓靈珍靈敏兄弟性至孝母亡家貧無以葬兄弟種瓜朝採暮還復生墓事由此舉

南史

任昉卒武帝方食西苑綠沉瓜投之於盤悲不自勝

上

強練師不知何許人所至之處人皆敬而信之

晉公護未誅之前曾手持一大瓠到護門外抵而破之乃大言曰瓠破子苦未幾而護誅諸子並伏法後周書○以下竹

竹則簞簞白烏實中糾族濱榮幽渚繁宗隈曲

萋倩陵丘蔓逮重谷

曹昆湘史賦見齊民要術

竹則苞甜赤若縹箭斑弓度世推節征合實中  
簞簞函人桃枝育虫緗箬素筍彤竿綠筒王彪之閩

中賦

竹之醜有四有青苦者白苦者紫苦者黃苦者

齊民要術

五月十三日謂之竹醉又謂竹迷上

竹得風其體大屈謂之竹笑

越王竹根生石上若細荻高尺餘南海有之南人愛其青色用爲酒籌云越王棄餘筍而生竹

草木狀

篩竹一名太極長百餘丈南方以爲船神異經

南方荒中有涕竹長數百丈圍三丈五六尺厚八九寸可以爲船其筍甘美煮食之可以止創

癘上

由梧竹吏民家種之長三四丈圍一尺八九分

作屋柱出交阯草木狀

雲母竹一節為船出扶南上

君乘土而王其政太平蔓竹紫脫常生禮斗威儀

雞腔竹筍肥美筍譜

石麻之竹勁而利削以為刀切象皮如切芋廣

州記

臨賀謝休縣東山有大竹數十圍長數丈有小竹生旁皆四五尺圍下有盤石徑四五丈極高方正青滑如彈棊局兩竹屈垂拂掃其上初無塵穢未至數十里聞風吹楚竹如簫管之音盛弘

之荆州記

有竹曰簞其大數圍節間相去局促中寔滿堅

強以為柱榱異物志

棘竹有刺長七八丈大如甕上

惠帝二年巴西郡竹生紫色花結寔如麥皮青

中米白味甜

晉起居注

狗竹毛在節間

臨海異物志

茸竹頭有父文籐

音模

竹黑皮竹有文籐

音感

毛籐

力印反

竹寔中

字林

凝波竹寔服之肌滑體輕趙飛燕舞於手掌上

服此寔也出區吳山紫枝綠葉堅滑如玉風吹

有聲如環珮成帝種於臨池觀更名曰環珮竹

花如海榴寔如蓮子而小

雲窓私志

東海畔孤竹生焉斬而復生中為舟武王時孤

竹人獻筍一枝

述異記

澁勒竹之有芒者也一名篋勞

林於竹薄而廣

竹譜

天門山角上各生一竹倒垂拂拭謂之天帚

盛弘之

之荆州記

玉潤桃枝之麗魚腸金母之名

梁簡文修竹賦

羅浮山第三十一嶺半是巨竹皆七八圍長二

二丈葉如芭蕉謂之龍鍾竹

南越志

有浮筠之幹葉青莖紫子大如珠有青鸞集其

上下有沙礫細如粉柔風至葉條翻起拂細沙如雲霧仙者來觀而戲焉吹風竹葉聲如鐘鼓之音拾遺記

建安有篔簹竹節中有人長尺許頭足皆具異花公孫竹高不盈尺可爲几案之玩會稽縣志

雷州貢電斑竹

植物之中有名曰竹不剛不柔非艸非木小異空實大同節目或茂沙水或挺巖陸條暢紛敷青翠森肅質雖冬蒨性忌殊寒九河鮮育五嶺

實繁萌勾苞籜夏多春鮮根幹將枯花復音福乃

縣箬音紂死也必六十復亦六年籊龍之美爰自崑

崙員丘帝竹舜一節爲船巨細已闕形名未聞

桂實一族同稱黑源籊尤勁薄博矢之資篔簹任篙笛體特堅圓棘竹駢深一叢爲林根如椎輪節若束針亦曰筓竹城固是任篔筍旣食鬚髮則侵單體虛長各有所育若實稱名其亦無目弓竹如藤其節卻曲生多臥土立則依木長幾百尋狀若相續質雖含文須膏乃縹厥族之中



蘇麻特奇修幹平節大葉繁枝凌群獨秀蒼葺  
紛披篔簹射筒篠簌桃枝長爽纖葉清肌薄皮  
千百相軋洪纖有差相繇旣僂厥土唯腥三堙  
斯沮尋竹乃生物尤世遠略狀博名般腸實中  
與筴相類於用寡宜爲筍殊味筋竹爲矛稱利  
海表槿仍其幹卽其杪生於日南別名爲策  
百葉參差生自南垂傷人則死醫莫能爲亦曰  
筍竹厥毒若斯彼之同異余所未知篙與由梧  
厥體俱洪圍式累尺筍實梧空南越之居梁柱

是供竹之堪杖莫尚于筍磔砢不凡狀若人功  
豈必蜀壤亦產餘邦一曰扶老名實縣同籟籟  
二族亦甚相似把髮若竹促節薄齒束物體柔  
殆同麻泉蓋竹所生大抵江東上密防露下疎  
來風連臥接町竦散崗潭雞脰似篔高而筍脆  
稀葉捎似類記黃細狗竹有毛出自東裔物類  
衆詭於何不許有竹象籟因以爲名東甌諸郡  
緣海所生肌理勻淨筠色潤貞凡今之筍匪茲  
不鳴會稽之箭東南之美古人嘉之因以命矢

筩篴載籍貢名荆鄙箬亦筩徙概節而短江漢  
之間謂之箴竹根深耐寒茂彼淇苑篴條蒼蒼  
接町連篴性不卑植必也崑岡踰矢稱大出尋  
爲長物各有用埽之最良又有族類爰挺嶧陽  
懸根百仞疎幹風生簫笙之選有聲四方質清  
氣亮衆管莫抗亦有海篠生於島岑節大盈尺  
幹不滿尋形枯若筋色如黃金徒爲一異莫知  
所任赤白二竹遠取其色白薄而曲赤厚而直  
沅澧所豐餘邦鮮植肅肅篴篴篴篴攢植擢筩  
於秋冬乃成竹無大無小千萬修直篴膜內高  
繡文外施箠筴誕節內實外澤作貢漁陽以供  
輅策浮竹亞節虛軟厚肉臨溪覆潦栖雲蔭木  
供筩滋肥可爲旨蓄厥性異宜各有所育篴植  
於宛簽生於蜀篠大籩小竹之通目互各統體  
譬牛與犢人之所知事生軌躅赤縣之外焉可  
詳錄臆之筆之匪邁伊矚晉武昌戴凱之竹譜  
瑤筩千年生一芽道書  
止些山竹長千仞風食其實去九疋萬八里千

廣博志  
卷之三  
三  
高州志  
筑陽孤竹三年而一筍南陵金盤之草一歲而一節

玄覽

竹名鬱離不知所出偶賭沈詩云繁陰上鬱鬱促節下離離似出於此

女紅志

漢章帝三年子母筍生白虎殿前時謂爲孝竹

群臣獻孝竹頌

述異記

竇將軍有青竹田

三輔舊事

馬援好事至荔浦見冬筍名苞筍上言禹貢厥

包橘柚疑謂是也其味美於春夏筍

東觀漢記

晉惠帝元康二年巴西郡界竹生花紫色結寔

如麥外皮青赤白味甚甘

異苑

王徽之以菖蒲映竹曰菖蒲只以九節爲貴而

此君面目聳焉菖蒲正當再拜此君而此君亦

安得不受之耶

高士春秋

辛仲宣截竹爲罌以酌酒曰吾性愛竹及酒欲

令二物相並耳

襄陽耆舊傳

張薦隱居願志家有苦竹數十頃在竹中爲屋

常居其中王右軍聞而造之薦逃避之竹中不

與相見一郡號爲竹中高士

永嘉郡志

臨川陳臣家大富永初元年臣在齋中坐其宅內有一町筋竹白日忽見一人長丈餘面如方相從竹中出逕語陳臣我在家多年汝不知今辭汝去當令汝知之去一月許臣家大失火奴婢頃死一年中便大貧

搜神記

宋郭仲產爲南郡從事宅在枇杷寺南其村亦名枇杷元嘉末起齋屋以竹爲牕櫺竹遂漸生枝葉長數丈抹疎葱翠鬱然成林仲產以爲祥

及孝建中同義宣之謀被誅

述異記

元嘉四年東陽沈道先家中筋竹林忽生連理野人無知謂之禍崇欲砍殺之

異苑

漢人有適吳吳人設筍問是何物曰竹也歸煮其牀簣而不熟乃謂其妻曰吳人輾輓欺我如此

笑林○

案九合內志文曰竹者爲北機上精受氣於玄軒之宿也所以圓虛內鮮重陰含素亦皆植根敷寔結繁衆多矣公試可種竹於內北宇之外

使美者游其下焉爾乃天感機神大致繼嗣孕  
既保全誕亦壽考微著之興常守利貞此玄人  
之秘規行者之甚驗陶隱居真誥

梁庾詵愛林泉常遇火止出書坐于池上曰惟

恐損竹彙苑○以下異草

嶓冢之山有艸焉其葉如蕙其本如桔梗黑花  
而不實名曰蔞蓉食之使人無子山海經

小華之山其草有草荔草荔香草也狀如烏韭

而生於石上亦緣木而生食之已心痛

石脆之山其草多條狀如韭白華黑實食之已

疥

熊耳之山有草焉其狀蘇而赤華名曰葶薺葶薺

取聽二音可以毒魚

朝歌之山瀕水出焉有艸名曰莽草可以毒魚

浮山有草焉名曰薰音訓草麻葉而方莖赤花而

黑實臭如薜蘿佩之可以已癘

其棗之山有草焉葵本而杏葉或作楛葉黃華而莢

實名曰穉可以已瞽

脫扈之山有艸焉其狀如葵葉而赤華名曰植

楮可以已癩癩病也淮南子曰狸頭已癩也食之不昧

大誓之山多糜玉有草焉其狀葉如榆方莖而

蒼傷其名曰牛傷其根蒼文服者不厥厥逆可氣病

以禦兵

臯塗之山有草焉其狀如橐茛其葉如葵而赤

背名曰無條可以毒鼠

有草焉其狀如蕞而方莖黃花赤實其本如藁

本名曰荀艸服之美人色

休與之山有艸焉其狀如著赤葉而本叢生名

曰夙條可以為幹

招搖之山有草焉其狀如韭而青華其名曰祝

餘或作桂茶食之不饑

有草焉其狀如茱白花黑實澤如蓂蓂其名曰

蓄草服之不昧

符禺之山其艸多條其狀如葵而赤花黃實如

嬰兒舌食之使人不惑

竹山有草焉其名曰黃萑其狀如樗其葉如麻

白華而赤實其狀如赭浴之已疥又可以已  
崑崙之丘有草焉名曰蕢草其狀如葵其味如  
葱食之已勞

牛首之山有草焉名曰鬼草其葉如葵而赤莖  
其秀如禾服之不憂

陽華之山其草名諸蕢多苦辛其狀如櫛其實  
如爪其味酸并食之已瘧

鼓鍾之山有草焉方莖而黃華員葉而三成其  
曰焉酸可以爲毒爲治也

姑搖之山帝女死焉其名曰女尸化爲莖艸其  
葉胥成言葉相重也其華黃其實如菟丘服之媚於  
人

有草焉葉員而無莖赤華而不實名曰無條服  
之不瘦

半石之山有草焉生而秀其高丈餘赤葉赤華  
華而不實其名曰嘉榮服之者不畏霆

少陁之山有草焉名曰蒟艸葉狀如葵而赤莖  
白華實如蓂莢食之不愚

賈超之山其中多龍修龍須也似莞而細生山石穴中莖倒垂可以為席

泰山有艸焉名曰黎葉狀如荻而赤華可以已

疽

大騮之山有艸焉其狀如著而毛青華而白實

其名曰獲服之不夭可以為腹病俱上

王者有禮則威綏生一曰威綏瑞應圖

威香者王者禮備則常生宋書

華平其枝正平王者有德則生德剛則仰德柔

則低

蕙甫一名倚扇

紫達王者仁義行則見並上

王者使賢不肖位不相踰則平露生庭狀如蓋

政平則正不平則傾一名平慮白虎通

王者繼嗣平明則賓連生於戶濶達生於房連

累相承象繼嗣也上

王者仁義行則生紫脫瑞應圖

漢武帝時西方日支國有獻活人草三莖有人



死者將艸覆面卽活之矣

述異記

帝昇蒼龍閣思仙術召諸方士言遠國遐方之事唯東方朔下席搯筆跪而進帝曰大夫爲朕言乎朔曰臣遊北極至種火之山日月所不照有青龍銜燭火以照山之四極亦有園圃池苑皆植異木異草有明莖艸夜如金燈折枝爲炬燭見鬼神之物仙人寤封常服此草於夜暝時轉見腹光通外亦名洞冥草帝令剉此艸爲泥以塗雲明之館夜坐此館不加燈燭亦名照魅

草以藉足履水不沉上

帝事仙靈唯謹甲帳前置玲瓏十寶紫金之鑪李少君取綵蜃之血丹虹之涎靈龜之膏阿紫之丹搗幅羅艸和成香每帝至壇前輒燒一顆烟繞梁棟間久之不散其形漸如水文頃之蛟龍魚鱉百怪出沒其間仰視股栗又然靈音之燭衆樂迭奏於火光中不知何術幅羅香草出

賈超山

奚囊橘柚

帝酌雲薤酒薤以玄草黑蕨金蒲甜蓼果以青

櫻龍瓜白芋紫莖寒蕨地花氣葛此葛於地下  
生花入地十丈乃得此葛其根倒出亦名金虎  
鬚草因名紫鬚葛也 洞冥記

有五味草初生味甘花時味酸食之使人不眠  
名却睡艸武帝時多末國獻此艸

有夢草似蒲色紅晝縮入地夜則出亦名懷夢  
帝思李夫人之容不可得朔乃獻一枝帝懷之  
夜果夢夫人因改曰懷夢草

波祇國亦名波弋國獻神精香艸亦名荃靡一

名春蕪一根百條其皮如絲可爲布

有鳳葵艸色丹赤松子餌之三歲乘黃虵入水  
得黃珠一枚亦名銷疾珠語曰寧失千里駒不  
失黃虵珠

烏哀國有龍瓜薤色如玉煎之有膏以和紫桂  
爲丸服一粒千歲不饑故語曰薤和膏身 生毛

掌中芥葉如松子取其子置掌中吹之而生一  
吹長一尺至三尺而止然後可移於地上若不  
經掌中吹者則不生也食之能空中孤立足不

躡地亦名躡空艸 並上

梁禾蔓生實如葵子米粉白如麩可爲饘粥食  
牛以肥六月種九月熟感禾扶疎生似大麥楊  
禾似藿粒細左折右炊停則牙生此中國巴禾  
木稷民火禾高丈餘子如小豆出粟持國 廣志

東墻色青黑粒如葵子似蓬艸十一月熟出幽  
涼并烏丸地 廣志

瀛州有艸名曰芸苗狀如菖蒲食葉則醉餌根  
則醒 拾遺記

有草名芸蓬色白如雪一枝二丈夜視有白光  
可以爲杖

有艸名薺煌葉圓如荷去之十步炙人衣則焦  
刈之爲席方冬彌溫以枝相摩則火出矣

岱輿北有玉梁千丈駕玄流之上紫苔覆漫味  
甘而柔滑食者千歲不饑

有葭紅色可編爲席溫柔如蜀毳焉

遙香艸其花如丹光耀日月葉細長而白如忘  
憂之草其花葉俱香扇馥數里故名遙香艸其

子如薏中實其香食之累月不饑渴

溽乘艸高五丈葉色紺莖如金形如半月之勢

亦曰半月草無實其質溫柔可以為布為席

並上

有合歡草狀如蓍一株百莖晝則衆條扶疎夜則合為一莖萬不遺一謂之神草

洞冥記

樂浪之東有背明之國來貢其方物其北有艸名虹艸枝長一丈葉如車輪根大如轂花似朝虹之色昔齊桓公伐山戎國人獻其種而植於庭云霸者之瑞也有宵明艸夜視如列燭晝則

無光自消滅也有紫菊謂之日精一莖一蔓延及數畝味甘食者至死不饑渴有焦茅高五丈燃之成灰以水灌之復成茅也謂之靈茅有黃渠艸映日如火其堅勒若金食者焚身不焚有蓼草葉如蒲莖如蓍採之以占吉凶萬不遺一又有聞遐艸服者耳聰香如桂莖如蘭其國獻之多不生實葉多萎黃

拾遺記

祖梁國獻蔓金苔色如黃金若縈聚之大如雞卵投於水中蔓延於波瀾之上光出照日皆如

火生水上也乃於宮中穿池廣百步時觀此苔以樂宮人宮人有幸者以金苔賜之置漆盤中照耀滿室名曰夜明苔著衣襟則如火光

上

瑤琨去玉門九萬里有碧艸如麥割之以釀酒則味如醇耐飲一合三旬不醒但飲甜水隨飲

而醒

述異記

秦趙間有相思艸狀如石竹而節節相續一名斷腸艸又名愁婦草亦名孀婦草人呼寡婦莎蓋相思之流也

義山多生微蘅艸有風不偃無風獨搖

蓆萇草一名塞路生北方胡地古詩云千里蓆萇

釣影山去昭河三萬里有雲氣望之如山影丹藿生於影中葉浮水上有紫河萬里深十丈中有寒荷霜下方香盛

日露池西有靈池方四百步有連錢荇浮根菱倒枝藻連錢荇荇如錢文浮根菱根出水上葉沉波下實細薄皮甘香葉半青半白霜降彌美

因名青冰菱也倒枝藻者枝橫倒水中長九尺餘如結網有野鴨秋鳧及鷗鷺來翔水上入此艸中皆不得出如繒網也亦名水網藻

楚中有宮人草狀如金盞花色紅翠俗說楚靈王時宮人數千皆多愁曠有囚死於宮中者葬之後墓上悉生此花

並上

武當縣石堦山西北角有大松樹樹下生草名救窮冬夏不枯日食三寸絕穀不饑登之度世陶先生謂之西岳佐命是也

福地記

壽榮艸出少室金山丘下服之令人不老取葉服之可通百神

典要

餌玉長生草一名通天價值千金陰乾方寸七日再服之令人得仙

上

祖洲近在東海之中地方五百里去西岍七萬里上有不死之艸生瓊田中或名養神芝草草形如菰苗長三四尺昔秦始皇大苑中多枉死者橫道有鳥如烏狀銜此艸覆死人面當時起坐而自活也

十洲記

古堙山帝之女死化為怪艸其葉鬱茂其華黃  
色其實如兔絲故服怪草者恒媚於人焉搜神記

良曜草莖葉如麻黃秋結子如小粟煨食之解

毒功用亞於吉利始有得是藥者梁氏之子耀

亦以為名梁轉為良爾花白似牛李出高涼草

木狀

吉利艸其莖如金釵股形類石斛根類芍藥交

廣俚俗多蓄蠱毒唯此艸解之極驗吳黃武中

江夏李侯以臯徙合浦始入境遇毒其奴吉利

者偶得是艸與侯服遂解吉利即遁去不知所

之候因此濟人不知其數遂以吉利為名

鶴草蔓當夏開花形如飛鶴嘴翅尾足無所不

備出南海云是媚艸上有虫老蛻為蝶赤黃色

女子藏之謂之媚蝶能致其夫憐愛並上

苦葺一名苦藏子形如皮弁始生青熟則赤裏

有實正圓如珠長安兒童謂為洛神珠一曰王

母珠古今注

赤縣洲為崑崙之墟玉紅之草生焉食其一實

醉臥三百歲

尸子

護門艸出常山取置戶下或有過其門者草必叱之一名百靈艸

南海有草叢生如藤蔓土人視其節以占一歲之風每一節則一風無節則無風名曰知風草

廣志

酒栝藤出西域大如臂葉似葛實如梧桐香美可酌能消宿醒

崔豹古今注

無畏艸本名乾先佩之虎豹施爪張牙不畏不

畏則不敢傷也出壽麻國戰國時仙人陸輿進十莖於魏安釐王無忌爲如姬感之旣盜兵符臨行又贈以夜光之珠乾先之草無忌辭珠而受艸至趙畀朱亥以助其威後朱亥入秦秦王命力士推入押中與虎居朱亥處之宴如虎亦相視如其類也秦王慙而遣之

雲牕私志

玄鹿之草生於各山人跡不到處烹而食之壽

二千歲

道篇

虞美人草聞吳歛而舞沙筋聞人聲則縮



舞草出雅州人或近之歌必動葉如舞也

襍俎

惠帝元熙元年三株艸化爲三樹枝葉似楊樹高五尺以應三楊擅權之事時有楊駿楊瑤楊濟三弟兄號曰三楊

拾遺記

劉愷艸一名鹿活草昔青州劉愷宋元嘉中射一鹿剖五臟以此艸塞之蹶然而起愷怪而拔草復倒如此三度愷密錄此艸種之多主傷折俗呼爲劉愷草

彙苑

孫皓天紀三年有鬼目菜生黃耆家依綠棗樹

長丈餘莖廣四寸厚三分又有買菜生吳平家高四尺厚三分如琵琶形上廣尺八寸下莖廣五寸兩邊生葉綠色東觀安圖名鬼目作芝草買菜作平慮艸遂以耆爲侍芝郎平爲平慮郎

吳志

武帝爲撫軍時府內後堂砌下忽生艸三株莖黃葉綠如總金抽翠花條苒弱狀似金螿時人未知是何祥有一羗人姓姚名馥字世芬充廐養馬妙解陰陽之術云此艸以應金德之瑞

拾

遺記

解叔謙字楚梁母有疾於夜庭中祈祠聞空中云此疾無他得丁公藤為酒便差即詣醫及本草皆無識者乃求訪至宜都遙覩山中一老翁伐木問其所用答曰此丁公藤治風尤驗叔謙伏地流涕具款求意翁與之四段并示漬酒法叔謙拜領受之復視翁不見依法為酒母疾頓愈齊春秋○以下異木

符禺之山其上有木名曰文莖其實如棗可以

巴聾

山海經

招搖之山有木焉其花四翼其名迷穀佩之不

迷

述異記云招搖山又名鵲山

肅慎之國有樹名雒常聖人代立於此取衣

其俗

無衣聖帝代立則此木皮可衣也

侖者之山有木焉其狀如穀而赤理其汗如漆其味如飴食者不饑可以釋勞其名曰白蓉可

以血玉

血謂可用染玉作光彩

崇吾之山東望螭淵有木焉員葉而白柎赤華

而黑理其實如积食之宜子孫

宣山有乘焉大五十尺圍五丈也其枝四衢言枝交互四出

其葉大尺餘赤理黃華青柎名曰帝女之乘婦

主蠶故以名乘

茲山有木焉其狀如棠而赤葉名曰苾草可以毒魚

柄山有木焉其狀如樗其葉如桐而莢實其名

曰芟可以毒魚芟一作艾

有木焉其狀如牛引之有皮若纓黃虵其葉如

羅其實如藥其木若蔭其名曰建木在窵窳西

弱水上

大荒之中有山名曰孽搖頽羝上有扶木柱三

百里其葉如芥柱猶起高也葉似芥菜

有雲雨之山有木名曰欒禹攻雲雨攻謂槎伐其林木

有赤石焉生欒言山有精靈復變生此木於赤石之上黃木赤枝

青葉群帝焉取藥言樹花實皆為神藥

有木青葉紫莖玄華黃實名曰建木百仞無枝

有九橚枝回曲也音如斤斲之斲下有九枸根盤錯也淮南子曰大木則根

懼音

其實如麻

似麻子也

其葉如芒

芒木俗棠梨也

大皞爰

過

言庖犧於此經過也

黃帝所為

言治護之也

不周之山爰有嘉果其實如桃其葉如棗黃華而赤杼食之不勞

有木焉其狀如棠而員葉赤實實大如木瓜名曰櫬木食之多力

放臯之山有木焉其葉如槐黃華而不實其名曰蒙木服之不惑

崧山多丹木葉員而赤莖黃華而赤實其味如飴食之不饑

敏山有木焉其狀如荆白華而赤實名曰薊音計相服者不寒

有木焉其狀如棠華黃赤實其味如李而無核名曰沙棠可以禦水食之使人不溺

崦嵫之山其上多丹木其葉如穀其實大如瓜赤符而黑理食之已瘴可以禦火

北號之山有木焉其狀如楊赤華其實如棗而無核其味酸甘食之不瘧

東始之山有木焉其狀如楊而赤理其汁如血  
不實其名曰芭可以服馬以汁塗之則馬調良

歷兒之山其上多榘多櫨木方莖而員葉黃華  
而毛其實如棟服之不忘

陰山多雕棠葉如榆葉而方實如赤菽食之已  
聾

有木焉名曰黃棘黃華而員葉其實如蘭服之  
不字

有木焉名曰天楸方莖而葵狀服者不噎食不噎

少室之山有木焉其名曰帝休葉狀如楊其枝  
五衢黃華黑實服者不怒

泰室之山有木焉葉狀如梨而赤理其名曰栢  
木食者不妬

講山有木焉名曰帝屋葉如椒赤實可以禦  
浮戲之山有木焉葉狀如樗而赤實名曰亢木

食之不蠱並上

白深桂夷用闌木夷東北夷也木生水中黑色而光其堅若鐵集韻闌茲消

切康人以桴苴桴苴者其實如李食之宜子康西

戎別名食桴苾卽有身  
說文苾苾一名馬鳥

山戎戎菽白州比閭比

閭者其華若羽伐其木以爲車終行不敗禽人  
管路人大竹五湖元唐鉅野凌

周書

南方大荒之中有樹焉名曰杻稼權杻杻梨也  
稼稼株稼也權親權也三千歲作花九千歲作  
實其花藥紫色其實赤色其高百丈或千丈也  
敷張自輔東西南北方枝各近五十丈葉長七  
尺廣四尺五色如綠青禾皮如桂梓辛理如苳  
草味飴實長九尺圍如長無瓢核竹刀割之如

酥得食復見實卽滅矣言復見後實熟者壽一

萬二千歲

神異經

東南荒中有椰木焉其枝喬直上二百歲葉落  
而生花花影如苳瓜復二百歲一落盡而生萼  
下生子三歲而成熟成熟之後不長不減子形  
如寒瓜此實不取萬世如故若取下子而留萼  
萼復生子如初瓢苳美如蜜食之令人身澤不  
可過三升令人冥醉半日乃醒一名無葉一名  
倚驕一名綺縞

南荒有如何之樹其實似棗其長五尺剖以金

刀則其蘆刀則辛竹刀則苦木刀則酢

並上

千載木其中有虫名曰賈訕狀如豚食之如狗

肉味 白澤圖

頻斯國有大楓木成林高六七十里善筭者以里計之雷電常出樹之半其枝交蔭於上蔽不見日月之光其下平淨掃灑雨霧不能入焉

拾

遺記

瀛州有樹名影木日中視之如列星萬歲一實

實如瓜青皮黑瓢食之骨輕上如筆蓋群仙以避風雨

員嶠山有木名猗桑煎樵以爲蜜

並上

都夷香如棗核食一片則歷年不饑以粒如粟米許投水中俄而滿大盂也

洞冥記

上林苑有白銀樹十株○黃銀樹十株○千年長生樹十株○萬年長生樹十株○扶老木十株○琉璃樹十株○池離樹十株○離婁樹十株○守宮槐六株○金明樹二十株○搖風樹

十株○鳴風樹十株 西京雜記

積草池中有珊瑚樹高一丈二尺一本三柯上有四百六十二條是南越王趙佗所獻號爲烽火樹至夜光景常欲燃 上

黃金山有楠樹一年東邊榮西邊枯後年西邊榮東邊枯年年如此張華云交讓樹也 述異記

影娥池北作鳴禽之苑有生金樹破之皮間有屑如金而色青亦名青金樹

聚窟州有返魂樹伐其根心於玉釜中煮取汁

又熬之令可丸名曰驚精香或名震靈丸或名

反生香或名卻死香死尸在地聞氣卽活 並上

影娥池有女香樹細枝葉婦人帶之香終身不

絕 洞冥記

無憂樹女人觸之花方開 華夷考

聖木食之令人智聖 上

海中有銀山生樹名女樹天明時皆生嬰兒日出能行至食時皆成少年日中盛壯年日晚老年日沒死日出復然



廣州有樹可以禦火山北謂之慎火多種屋上以防火也

南越志

木有摩厨生於斯調國其汁肥潤其澤如脂膏

馨香馥郁可以煎熬食物香美如中國用油

異物志

志

都句樹似栝櫚木中出屑如麩可啖

劉欣期交州記

葇母樹皮有蓋狀似栝櫚但脆不中用南人名

其實為葇用之當裂作三四片

上

五子樹實如梨裏有五核因名五子治霍亂金

瘡

裴淵廣州記

平興縣有華樹似董又似桑四月常有花可食

甜滑無子此薺木也

顧微廣州記

木蜜樹號千歲根甚大伐之四五歲乃斷取不

腐者為香生南方积木蜜可食

廣志

禰連山有僊樹人行山中以療饑渴者輒得之

飽不得持去平居時亦不得見

西河舊事

莎樹出麩一樹出一石正白而味似枕椰出與

古

蜀志記

棹樹榦葉俱似椿以其葉鬻汁漬果呼爲棹汁若以棹汁襍蔬肉食者卽時爲雷震死棹出高

涼郡

南方草木狀

西安府鄠縣有淨土樹俗傳西域鳩摩羅什憇此覆其屨土中生茲樹二月開花如桃花

東海有倒生之木觸之則葉翕上黨有不灰之木蘸以石腦油則燃火食西有嬰彌之樹見人善笑摘之則槁

玄覽

東武有勝火之木燒之不死亦無損也

齊地記

嶺南容州有勾芒木可以爲布里人所之新條

更生取之績以爲布

寰宇記

男青樹名也

羅浮山記

女青亦木名見道藏有女青鬼律

彙苑

顧渚山有櫨子樹其木如玉色渚人採之以爲杖

熊耳山上有青丹之樹得而服之成僊

盛弘之荆州記

木連理王者德澤純洽八方合爲一則生

宋書

昭王與西王母遊通雲臺常有衆鸞鳳鼓舞如

琴瑟和鳴神光照耀如日月之出臺左右種恒  
春之樹葉如蓮花芬芳如桂花隨四時之色昭  
王之末仙人貢焉列國咸賀王曰寡人得恒春  
矣何憂太清不至恒春一名沉生如今之沈香  
也有草名濡紆葉色如緝莖色如漆細軟可縈  
海人織以爲席薦卷之不盈一手舒之則列坐  
方國之賓莎羅爲經莎羅草細大如髮一莖百  
尋柔軟香滑群僊以爲龍骨之轡拾遺記  
東方朔從西邨汗圃歸得聲風木十枝獻帝長

九尺大如指此木臨因桓之水則禹貢所謂因  
桓是也其源出甜波樹上有紫燕黃鵠集其間  
實如油麻風吹枝如玉聲因以爲名帝以枝遍  
賜群臣臣有凶者枝則汗臣有死者枝則折昔  
老聃在於周世年七百歲枝竟未汗偃佺生於  
堯時年三千歲枝竟未一折帝乃以枝問朔朔  
曰臣已見此枝三過枯死而復生豈汗折而已  
哉里語曰年未半枝不汗此木五千年一汗萬  
歲不枯

洞冥記

元光中帝起壽靈壇壇上列植垂龍之木似青  
梧高十丈有朱露色如丹汁灑其葉地皆成珠  
其枝似龍之倒垂亦曰珎枝樹 述異記

漢世有道士從外國將貝多子來於嵩高西脚  
上種之有四樹與衆木有異一年三花白色香

美 初學記

華林園君子樹三株

晉宮閣名

明帝太寧元年九月會稽剡縣木生如人面是  
後王敦稱兵作逆禍敗無成 晉書

巴陵縣南有寺僧房牀下忽生一木隨生旬日  
勢凌軒棟道人移房避之木長便遲但極晚秀  
有外國沙門見之名爲娑羅也彼僧所憇之蔭  
常著花細如白雪元嘉十一年忽生一花狀如

芙蓉

盛弘之  
荊州記

齊永明九年秣陵安明寺有古樹伐以爲薪木  
自然有法大德三字 西陽雜俎

吳興山中有一樹類竹而有實似莢狀鄉人見  
之以問陸澄澄曰名洛如花郡有文士則生 張寶

就印  
錄

南海郡送都念子樹一百株勅付西苑十六院  
內種此樹高一丈許葉如楊枝柯長細花金色  
花葉正赤似蜀葵而大其子小於柿子其酸至  
美蜜漬爲粽益佳

大業拾遺

煬帝令朱寬征瑠球國還獲男女口千萬人并  
襍物產與中國多不同得金荆榴數十斤木色  
如真金蜜緻而文彩盤蹙有如美錦盛香極清  
可以爲枕及案面雖沉檀不能及之

蒙苑

佛在世時有闍陀比丘須木造房有薩羅樹林  
便往伐之持用成房爾時林中有鬼神依止此  
林語闍陀言莫斫是樹令我小弱男女暴露風  
雨無所依止闍陀答言死鬼速去莫住此中誰  
喜見汝即便伐之時此鬼神卽大啼哭將諸兒  
子詣世尊所佛知而故問汝何以啼哭答言世  
尊尊者闍陀伐我林樹持用作房我男女大小  
風雨漂露當何所依爾時世尊爲此鬼神隨順  
說法憂苦卽除去佛不遠便有林樹世尊指授

令得住止

法苑珠林

有神藥樹名曰摩羅陀祇主厭天下萬毒不得妄行有大神蛇身長一百二十尺蛇行索食有黑頭蟲身長丈五蟲行道中與蛇相逢適欲舉頭前嚙大蟲蛇聞藥香屈頭欲走蛇身羅藥樹卽中斷分作兩段頭半生欲走尾便臭爛諸毒聞此蛇臭衆惡毒氣皆悉消滅

善信經

昔閻浮有國名波羅奈時有人名摩訶夜移有二子長名善求好積諸德慈愍衆生次名惡求好爲惡事恒生貪心懷嫉妬意年各長大共行入海求索寶物各有五百侍從途路懸遠中道乏糧經於七日去死不遠是時善求及諸賈人咸共誠心禱諸神祇欲濟饑險於空澤中遙見一樹枝條鬱茂便卽趣之有一泉水善求及衆悉共哀求樹神現身語之斫去一枝所湏當出諸人歡喜便斫一枝美飲流出斫第二枝種種食出百味具足咸共承接各得飽滿斫第三枝出諸妙衣種種備具斫第四枝種種寶物悉皆

具足裝馱悉滿所須盡辦惡求後到衆人如前  
盡得充足便自念言今此樹枝能出是種種好  
物况復其根今當伐之足得極妙佳好之物令  
人代之善求語惡求言我等饑乏蒙此樹恩得  
濟餘命云何而欲伐之惡求卽掘其根善求感  
佩不忍見之領衆歸家伐樹已竟有五百羅刹  
取此惡求及諸賈人悉皆噉之財物喪失

過去閻浮提人壽八萬歲時有轉輪聖王出世  
名高羅婆王有樹名善住尼拘類王而有五枝  
第一枝者王所食及皇后第二枝者太子食及  
諸臣第三枝者國人民食第四枝者沙門梵志  
食第五枝者禽獸所食尼拘類樹果大如二升  
瓶味如淖蜜丸無有護者亦無相偷有一人來  
饑渴極羸顏色顛頓欲得食果往至樹王所飽  
嚼果已毀折其枝持果歸去尼拘樹王有一天  
依而居之彼作是念閻浮洲人異哉無恩無有  
反覆我寧令樹無果卽不生果復有一人饑渴  
極羸欲得嚼果往詣樹所見樹無果卽往詣高

羅婆王所白曰天王當知善住尼拘樹王無果  
王聞已如力士屈伸臂頃至三十三天住帝釋  
前白曰拘翼當知尼拘樹王不生果於是帝釋  
及高羅婆王如力士屈伸臂頃至善住尼拘類  
樹不遠而住化作大水暴風雨已拔根倒樹於  
是樹王居止樹天因此故憂苦愁感啼泣垂淚  
在帝釋前立帝釋問曰何意啼泣彼天白曰當  
知大水暴風雨拔根倒樹願善住尼拘類樹王  
還復如本於是天帝復化作大水暴風雨已今

尼拘樹王卽復如故

阿含經

廣博物志卷之四十二

終

高暉堂



廣博物志卷之四十四

隴西董斯張纂

莆中周 嬰訂

鳥獸一 諸鳥上

夷貊掌鳥言貉貊掌獸言 周禮

羅氏掌羅鳥鳥蜡則作羅襦中春羅春鳥獻鳩  
以養國老行羽物

掌畜掌養鳥而阜蕃教擾之祭祀共卵鳥歲時  
貢鳥物共膳獻之鳥

國家圖書館 NATIONAL CENTRAL LIBRARY, TAIWAN, R.O.C.

翼氏掌攻猛鳥各以其物爲媒而拑之以時獻其羽翮

若簇氏掌覆天鳥之巢以方書十日之號十有二辰之號十有二月之號十有二歲之號二十有八星之號縣其巢上則去之

庭氏掌射國中之天鳥若不見其鳥獸則以救日之弓與救月之矢夜射之若神也則以太陰之弓與枉矢射之

射鳥氏掌射鳥祭祀以弓矢毆鳥爲凡賓客會

同軍旅亦如之射則取矢矢在侯高則以并夾取之並上

金水之子其名曰羽蒙乃之羽民是生百鳥歸

藏啓筮

孟虧人首鳥身其先爲虞氏馴百禽夏后之末

民始食卵孟虧去之括地圖

武帝問朔何知鳥之雌雄對曰雄左翼加右聲

高雌右翼加左聲小方朔傳○一云燒毛納水中沉者雌浮者雌

陸鳥曰棲水鳥曰宿獨鳥曰止衆鳥曰集禽經

人面擊地飛鳥自下

取藥末爲人形似鳥而血塗人面以擊地鳥自形下

○萬軍術

鳥啣人之髮夢飛

衆鳥羣飛徘徊軍上不過三日有暴兵至鳥聚軍中將軍當賞功增秩鳥集將軍之旗將軍增官鳥集軍中莫知其名軍敗

抱朴子軍術

小鳥生大鳥王者土地開闢則至

宋書

平原管輅善卜筮解鳥語

勃海劉長仁有辯才初雖聞輅能曉鳥鳴後每

見難輅曰夫生民之音曰言鳥獸之音曰鳴故言者則有知之貴靈鳴者則無知之賤名何由以鳥鳴爲語亂神明之所異也輅答曰夫天雖有大象而不能言故運星精於上流神明於下驗風雲以表異役鳥獸以通靈表異者必有浮沉之候通靈者必有宮商之應是以宋襄失德六鷁並退伯姬將焚鳥唱其災四國未火融風已發赤鳥夾日殃此荆楚此乃天上之所使自然之明符考之律呂則音聲有本求之人事則

吉凶不失昔在秦祖以功受封葛盧聽音者在  
 春秋斯皆典謨之實非聖賢之虛名也商之將  
 興由一燕卵也文王受命丹鳥啣書此乃聖人  
 之靈祥周室之休祚何賤之有乎夫鳴鳥之聽  
 精在鶉火妙在八神自非斯倫猶子路之於死  
 生也長仁言君辭雖茂華而不實未之敢信須  
 更有鳴鵲之驗長仁乃服管輅別傳○以下鸞  
 羽嘉生飛龍飛龍生鳳皇鳳皇生鸞鳥鸞鳥生  
 庶鳥凡羽者生於庶鳥毛犢生應龍應龍生建

馬建馬生麒麟麒麟生庶獸凡毛者生於庶獸  
 介鱗生蛟龍蛟龍生鯢鯢生建邪建邪生  
 庶魚凡鱗者生於庶魚介潭生先龍先龍生玄  
 龜玄龜生靈龜靈龜生庶龜凡介者生於庶龜

淮南子

龍之鱗八十有一鯉之鱗三十有六麟肉角而  
 不觸鳳肉隰而不啄蛟骨青鳳骨黑玄覽

鹿角牛耳駝首鬼目蛇項蜃腹魚鱗虎掌鷹爪  
 龍之狀也鴻前麐後蛇頸魚尾鶴頰鴛腮龍文